

漢魏六朝百三家集

周北

庾開府

第九十四冊

EAST ASIAN LIBRARY  
RM 8049 ROBARTS LIBRARY  
UNIVERSITY OF TORONTO  
TORONTO, CANADA M5S 1A5

V.94







神道碑

周上柱國齊王憲神道碑

昔者軒皇受姓，十有四人。周室先封，十有五國。自爾承基，纂胄保姓受氏。雖復千年一聖，終是百世同宗。故知昔之東京，旣稱炎漢；再受今之周歷。卽是鄴都中興，公諱憲字毗賀，突恒州武川人也。晉太康之世，據有黃龍。魏孝昌之初，奄荒玄菟。太祖以百二諸侯，三分天下；函谷先登，鴻溝大定。功業如此，人臣以終。公含章天挺，命



世誕生降太一之神下文昌之宿珠角擅奇山  
庭表德儀範清冷風神軒舉聳動廊廟光華城  
闕未逾齠齡已議論天下事人或曰是謂弱木  
一枝旁蔭數國長河一直自然千里風颺欲遠  
光景將昇後魏二年封涪城縣開國公時年五  
歲也虹蜺滿野是廢當途之高鸞鶯鳴岐實始  
維新之命國家光宅受圖欽明秉厯大風初卷  
長沙始封周元年進爵安城郡公食邑二千戶  
仍授使持節驃騎大將軍開府儀同三司開府



同於馬駿。秩擬六卿。驃騎等於劉蒼。位高三事。  
宗子維城。彼多慙色。武城二年。授使持節大將。  
軍都督益壽甯等二十四州諸軍事。益州刺史。  
改封齊國公。食邑萬戶。公豈年十有六。王武子  
以上將開府。未滿立年。荀中郎爲十州都督。才  
踰弱冠。方之於公。已爲老矣。加復營邱。負海。齊  
桓公受賑之城。岷山導江。漢武帝求仙之地。自  
非名陵孤竹。聲振沉黎。豈得南至穆陵。西登積  
石。幸無白虎之患。甯待黃龍之盟。叩笏畏威。激



盧仰德。生爲立廟。刻石頌功。成都有文翁之祀。非謂生前。漢陽有諸葛之碑。止論身後。比之今日。豈可同年而語哉。保定四年。與大司馬蜀國公圍金墉城。師臨洛浦。則廣武營奔。兵上邳山。則河橋路斷。八川風俗。五方名利。鐵市銅街。風飛塵起。天和元年。徵還行雍州牧。公以日月之明。威神其政。漆沮旣從。荆岐卽又。少陽用事。路不喘牛。仲秋以殷。民無驚水。二年拜大司馬。仍理小冢宰。營室殿軍器太監。天官以邦國爲基。



是司六典。夏官以兵戈爲主。專謀七德。是以罷  
械填委。旣包吳漢之功。宮殿崢嶸。彌壯蕭何之  
法。皆以白露涼風。務閑農隙。督兵三萬。出自宜  
陽。拔伏龍之城。平姚萇之壘。馬陵削樹。魏將路  
窮。平陰聽烏。齊師其遁。天子冢弟。禮絕羣公。仁  
義所往。事資道德。建德元年。進爵爲王。仍拜大  
冢宰。姬旦封於曲阜。不廢居中。劉交國於彭陽。  
無妨常從。豈直周召二南。竝居師傳。晉鄭兩國。  
俱爲卿士而已哉。匈奴突於武川。燿火通於灊



上公述職巡御。治兵朔方。馬邑星飛。龍城月動。  
撓畱犁之酒。經畧不前。失煙支之山。下馬而去。  
東隣逆命。返道敗德。囚箕子於寒庫。罵文王于  
玉門。天子將有孟津之師。召公獨議。公報以誕  
應天命。克成厥勲。昔者秦昭起師于蜀。直問張  
儀。晉武用兵于吳。惟謀羊祜。於是中軍無帥。會  
曰有歸。五年拜上柱國。元戎東討。給王鐵騎二  
萬。先襲太原。斗建麾兵。天離轉戰。虎嘯風騰。雲  
飛電掩。林胡棗栗。詎得充饑。晉陽荻蒿。何能拒



防。又加王精兵六萬，長圍晉州。然後六軍星陳，  
萬騎雷動，中權始及前茅，已戰。自爾卽爲前鋒，  
橫行入鄴，觀彼車結槐本。馬驚旋湍，積甲高昆  
陽之城。戶封塞富平之水。莫不如彼建瓴，同斯  
破竹。一朝指揮六合，大定是用光昭。下武翼亮  
中都，足以攄祖宗之宿憤，解生民之怨黷。方當  
待彼石間，部斯玉鼓。經緯天地，光華日月。旣而  
赤烏夾日，黃熊入寢。實沉無祀，桑林不祭。宣政  
元年六月二十八日薨。春秋三十有四，季友之



亡魯可知矣。齊喪子雅。姜其危哉。公罷宇淹曠。  
風神透遠。璣鏡照林。山河容納。置樽待酌。懸鐘  
聽扣。聲動天下。光照四鄰。武皇帝以介弟懿親。  
特垂愛友。而密謀奇策。加禮敬焉。常謂左右曰。  
孔子云。自吾有回。門人日親其齊王之謂也。用  
之作宰。則萬方協和。用之撫軍。則四表懾伏。豈  
直臯繇爲士。國無不仁。隨會爲卿。民無羣盜。愛  
翫書籍。敦崇禮樂。管絃入耳。則溪谷俱調。文雅  
沿心。則煙霞竝韻。養由百發。落鴈吟猿。應奉五



行。綈紉纁帙。雍容舉止。抑揚談論。當世以爲楷  
模。搢紳以爲軌範。則少有壯志。頗校兵書。玄水  
降靈。穀城授策。飛風長柳。月角星眉。莫不吟誦  
在心。撰成于手。所著兵法。凡有五卷。六韜九法。  
不用吳起舊書。三令五申。無勞孫武先誠。可謂  
有忠孝焉。有壯武焉。不自驕矜。謙光下物。宋人  
獻玉。不貪爲寶。百成子高。守仁爲富。不謂以信  
致欺。爲善非樂。天年不享。嗚呼哀哉。以某年月  
日。葬于石安縣洪瀆川之里。原隰悽愴。埋於盛



德幾年、邱陵搖落、蘊于才良永矣、乃爲銘曰

悠哉朔方、逝矣窮陰、山連鳥道、地盡龜林、重黎  
業大、伯翳功深、胄其積德、必有君臨、太祖撥亂、  
喪君有君、功廻地軸、策動天文、猶臨赤水、尚復  
黃雲、諸侯八百、天下三分、公之挺生、寔惟天假、  
翠微神降、文昌星下、照于四國、充千兩社、舟楫  
江河、棟梁華夏、水涵詞鋒、風飛文雅、純深之性、  
地極天經、忠貞之道、事感百靈、君親惟一、臣子  
惟甯、忠泉出井、孝笋生庭、乃宰天官、爲國之輔、



是居上將爲天之柱乃聖乃神惟文惟武策高  
開闢威移雲雨九宮神畧三術謨明天離轉戰  
月德廻兵黎陽水駭官渡山驚冀州旣載東原  
底平溟波欲運弱木將危中峰岳斷半海鵬垂  
鳳沉丹穴龍亡黑陂臨淄廢市東武山移千秋  
萬古英靈在斯

周太子太保步陸逞神道碑

公諱逞字季明本姓陸吳郡人也君子至止旣  
紹虞賓鳳凰于飛實興齊國南越使者解漢帝



之衣。西陵將軍覆吳王之蓋。曾祖載爲宋王司馬。畱鎮關中。赫連之亂。伏劒魏室。黃河叅陵。或亡追路。烏江艤船。更無歸迹。今爲河南洛陽人也。高祖冠軍將軍。榮州刺史。吳人有降附者。悉領爲別軍。自是官師擁鐸。更爲吳越之兵。君子習流。別有樓船之陣。父政驃騎大將軍。儀同三司。恒州刺史。中都獻公。太祖扶危濟傾。經綸夷阻。報君之耻。遠襲平原。以高平霸業所基。委命畱事。關中餽食。非直滎陽之師。河內供軍。豈但



洪園之竹。公秉照晉之靈。降明神之德。猛虎振檻。七年不驚。羝羊觸藩。九齡能對。諸兄以公先君愛子。稱之曰仁。推而襲封。雖復季末大成之心。守節疑有闕誤。既遭燹穴。翻從壓紐。太祖初封函谷。始合諸侯。以公詞令。叅謀機密。故得戎政克宣。師言無漏。賜姓步陸孤氏。委鹿輅而論都。入鴻門而舞劍。方之吹律。綽有餘榮。出身羽林。監輕車將軍。除尚書右丞。官聯會計。務應平隼。水衡貫朽。常平粟紅。授使持節車騎大將軍儀同



三司增邑千戶。尋遷駕部中大夫。領吏部中大夫。歷藩部御伯。東京鼎實。先加鄧騭之勲。西晉官人多用山濤之啓。豈若五王登朝。必司賓主之禮。六龍御轡。取定鸞和之節。御正以官。觸父名不拜。會稽有王會之名。其子不爲太守。博陵有王沉之封。其兒不爲刺史。遷驃騎大將軍。開府。入掌納言。治司宗伯。又爲軍司馬。職居常伯。勤問於南宮。位管王言。連官於北斗。豈止郊天祀地。龍門蜺谷之聲。贊鼓頌旗。白露涼風之月。



闇夜有人餉羅數十匹。公閉門不受。行人于觸  
具以聞。奏朝野稱之。太尉楊震直推故吏之金。  
涼州張奐高揖羗人之馬。清畏人知。我無慙德。  
齊國通和。封人受使。以公有出境之才。見命張  
壇之禮。旣珠盤歃血。定楚國之連名。匕首登壇。  
反齊人之侵地。是謂使乎。固稱光國。三輔公侯  
五陵鐘鼎。桐街柳市。塵起風飛。乃授京兆尹。增  
邑。通前一千六百戶。餘官如故。上林兵息。蘭池  
盜靜。不學王陽。平生鑄金之術。未同張敞。終日。



章臺之遊。家僮暮行。還得遺錢於道。并白絕十匹。公訪得其主。卽以還之。見金於路。指以示人。得錢於道。持留挂樹。方之今日。異代同風。俄遷司會。治小司馬。重總六軍。再操八柄。考績入於歲成。論功書之年表。尋授都督宜州諸軍事宜。州刺史。露冕觀風。停車待雨。百城解印。憚朱穆之威。千里相迎。愛王基之德。曾未朞月。被勅追還。眷眷吏民。不無河內之請。依依故老。實念黎陽之別。少陽養德。前星守器。尊師讓齒。必俟賢



能乃授太子太保。方之劉寔。道高於大邦。譬以  
山濤。榮深於小輦。本有消渴之疾。常餌金石自  
理。舊疾微增。奄捐館舍。茂陵之下。不留封禪之  
書。校尉之營。惟餘服食之器。嗚呼哀哉。春秋四  
十有七。建德二年五月十一日也。天子以大臣  
之喪。躬輟聽訟。東朝以師傅之尊。親臨攢祭。詔  
贈大將軍。謚某公。禮也。以今三年正月十日。塋  
於京兆之高陽原。夫人郁久間。西遇王姬。愛敬  
肅恭。言容令淑。有聞箴誨。無廢絃誼。爰在盛年。



先從大夜。今節婦開墳。松柏已拱。季孫成寢。邱陵始同。況復圖畫賢妃。方在甘泉之室。瘞埋才子。卽用高陽之原。公儀表外明。風神內照。器量深沉。階基不測。事君惟忠。事親爲孝。言爲世範。行爲士則。畱連墳素。悃悃文詞。霜府錄於尚書。天官總於司會。出入匡贊。常帶數軼。身具六龜。腰恒四綬。陳平密謀。旣非天子所見。荀彧上策。又非諸侯所聞。其爲郡也。惟取赤土。封書其爲州也。唯以青鹽。換粟畱家。則千樹無資。遺子則



一經而已。嫡子操至性過禮，純孝不遺墳前之  
樹，染淚者先枯；庭際之禽，聞悲者則下。銘曰：  
山連日觀，水枕滇機。富春沙起，開陽柱飛。大夫  
屈節，將軍振威。南越受吏，西陵解圍。昔我烈祖，  
垂翅秦中。白馬無路，烏江不通。笛吟鄉里，琴哀  
土風。營州恒州，擁旄世載。壯節旃矜，人雄關塞。  
直河穿趙，平雲臨代。生謂立功，沒爲留愛。降茲  
岳瀆，誕此貞明。祥符雲氣，慶合星精。宮帷定策，  
殿柱書名。忠泉暗涌，孝笋寒生。世屬殷周，肯逢



楚漢天下三分鴻溝一半以我明略來叅匡贊  
日乃再中天成兩旦遞叅三事厯副六卿天司  
光宅地載謨明春官定禮夏官治兵讖言默識  
溫樹無名謙恭周密言行無乖忠公兕殪陰德  
虵埋軍國紛總部領填堦一作馬不入廐金不

入懷具瞻惟德高山惟仰甲觀初登龍樓初上  
東國桓榮西京疎廣年齡俄頃風電相推銘旌  
兩沒池柳雙迴煢煢瘠子御疚銜哀身彰野火  
心懼天雷月日其除榮終哀始馬歸司隸書還



太史厯對天星，墳連地，市山勢接飛松，形蓋起德音無絕，平原忽矣。

周大將軍司馬裔神道碑

公諱裔，字遵胤，河內溫人也。昔顓頊之命，始則南正司天，重黎之後，又以羲和掌厯。夏陽適晉，得隨會而同奔。東海避秦，與毛公而俱隱。其後金行受命，玉笥南遷，帝系極于輿圖，中朝至於江表，曾祖楚之，晉太傅錄尚書、揚州牧、會稽文孝王之次子，元顯之幼弟也。元顯見害之後，桓



玄篡逆之初，爰自齟齬。客身屠釣，河內道左。抱  
劒長號，代郡城前。慟悲靈祭，江淮志節之士。汝  
穎風塵之客，感激一言。咸多依附。旣而雲生伏  
龜，星出鯨魚。太白經天，蚩尤映野。公乃收合餘  
燼，泣血登陴。臨武牢之關，據成臯之坂。擁衆萬  
家，歸於魏室。魏明元皇帝遙授平南大將軍、荆  
州刺史、襲封瑯琊郡王、尚河內公主，命王承制  
從賓國之儀。于豈宋兵憑陵，旗鼓侵逼，虎牢不  
封，金墉無援。魏太武皇帝授王使持節、侍中、安



南大將軍開府儀同三司給前後部鼓吹元戎  
啓行志雪冤耻登壇慷慨三軍掩泣黃河漕粟  
已出石門仕馬連旗將臨野坂旣而雲中柝起  
代郡烽燃反旆南轅途窮北畧贈征西大將軍  
都督梁益秦甯荆兗青豫郢洛十州諸軍事揚  
州牧司徒謚貞王祖金龍封瑯琊鎮西大將軍  
儀同三司吏部尚書贈司空謚康王父悅鎮南  
將軍豫州刺史漁陽莊侯以荆河刺舉嘗值亂  
離釁起蕭牆遂終非命公遺腹載誕流離寇逆



複壁襁負深山擁樹程嬰之匿趙武從役家臣  
王成之藏李燮爲傭酒市遭太夫人憂苦草墳  
塋以終灰燼形骸毀瘠逾於喪禮年十有五始  
幹家事楹前鑿柱卽取遺書石上開松仍求故  
劍出身司徒府參軍除中堅將軍員外散騎常  
侍值魏室多難所在蜂起孟津以北無復封畿  
嵩山以南卽爲鋒鏑公建議修武立柵溫城函  
谷西封河橋北斷長亭籍馬竝入武城百里租  
卓咸輪溫縣太祖文帝締構關都經綸夷阻招



攜以禮懷遠以德。馬文淵之擇主。去隴坻而歸  
身。竇周公之入朝。在河西而奉詔。大統七年蒙  
授平東將軍。北徐州刺史。十年。河內故義四千  
餘家。願立忠誠。須公衣錦。乃授使持節。領河內  
太守。加前將軍。懷州拓境。兩鎮奔波。柳泉轉戰。  
三城授首。十三年。太祖召山東諸立義之將。能  
率衆入關者。有加重賞。公率先而至。領戶千室。  
卽以爲封。固辭不受。其菽粟之賜。或以指囷。馬  
牛之賞。將同量谷。朝廷以華陽西極。漢水東流。



歎孟達之奔兵。惟劉封之失策。魏前元年。移鎮漢中。除白馬城主。領華陽郡守。昔稱導漢。今聞上瀕。煙沉冰井。雨歇雲門。其年授大都督。加散騎常侍。柱國。蜀國公。開金牛之道。通牧馬之關。公卷甲北塞。懸軍東馬。遂得策預葭萌。勲叅綿竹。封龍門縣。開國子。蒲州刺史。仍領新州。尋授使持節。車騎大將軍。儀同三司。大中正。隆周授圖。天保大定。以公才望。仍爲舊臣。遂乃義深迫遠。恩隆繼絕。卽改封瑯琊縣公。邑五百戶。仍遷



驃騎大將軍開府儀同三司都督巴州諸軍事  
巴州刺史武成二年被勅赴援信州魚復道阻  
屢却岑彭荆門水急幾沈吳漢公乃月峽先登  
瞿塘直上天子以公操履忠勤儀刑亮直乃徵  
爲大御伯尋轉大御正邑一千一百戶樞機近  
侍出納絲言所謂多識舊章殿中無雙者矣四  
年大軍東討公所領義衆先守枳關授都督懷  
州諸軍事懷州刺史偃師張幕河陽牧馬雖接  
戰于富平已連營于官渡五年詔追還拜始州



刺史更討信州。賊山彰尋寶渝恃險。峽路五尺。絙約纔通。縣水三門。橋飛濟渡。旣而風行草偃。谷靜山空。前後平十一城。獲九千餘口。馬歸平樂。金輸水衡。天保二年。除信州刺史。都督信州諸軍事。朝發白帝。暮宿江陵。氣振巴邱之兵。威警建平之戍。五年。遷潼州刺史。益州柱國公。降帝子之重。鎮天井之星。延閣擬于叢臺。岷山方于代郡。公仰稟雄謨。叅謀遠略。故得身預舞陽之功。位極長平之寵。六年。授使持節大將軍大



都督西甯州諸軍事西甯州刺史方欲關沫若  
徼牂牁見夜郎之侯習昆彌之戰而飛鳶墮水  
馬援去而無歸金馬騁光王褒行而不反嗚呼  
哀哉七年正月十日薨春秋六十有五詔贈使  
持節大將軍懷邵汾晉四州諸軍事懷州刺史  
夫人襄城公主魏獻帝之曾孫趙穆王之季女  
王姬肅恭瑜翟禮典四教兢莊三星令淑有光  
隆慮之賢足表平陽之盛生則從夫以秩死則  
同穴以禮建德元年八月十二日合葬于武功



三豈原大夫墓樹以柏諸侯墳高于雉吁嗟滕公來居此里詔謚定公禮也公資忠履孝蘊義懷仁直幹千尋澄波萬頃逢蒙射法方牧兵書星辰高下之占風雨逢迎之氣故得師出以律天幸將軍者也至如官曹案牘未嘗煩壅戎馬交馳不妨餘裕足使四岳彌峻三台更明在朝四十一年身經一百餘戰凡任四郡厯八州未嘗以貨殖經懷去如始至渭南千畝之竹更懼盈滿池陽二頃之田常思止足身歿之日家無



餘財。素車白馬。狹室崎嶇。黃腸立甲。堦庭仄陋。  
有詔冬官。爲營寢室。朱邑祭酹無所。漢后是以  
賜金。陳表妻子露立。吳王爲之開館。嗚呼哀哉。  
世子侃孝家忠國。揚名顯親。是以勒此豐碑。懼  
從陵谷。植之松栢。不忍凋枯。銘曰

欽若厯象。平秩寅賓。少梁奔華。地入咸秦。族夷  
興馬。書窮獲麟。玉鏡云始。金行乃構。象浦通關。  
龍沙開候。上糝石起。河陽水鬪。五馬南浮。三星  
東宿。太傅作牧。奄有江沱。司徒避亂。承制荆河。



南勞推轂，猶思枕戈。龍媒被野，蒼兕凌波。莊侯  
季年，禍機相接。誕公遺嗣，崎嶇懷挾。山竄趙武，  
家藏李燮。伍員道阻，燕丹路遙。南奔楚塞，北避  
秦橋。水流登隴，寒風度遼。有功都護，則重嫖姚。  
懷書上馬，習禮從戎。陣圖六甲，兵占八風。藏松  
寶劍，射柳凋弓。推誠賈復，屈節廉公。八翼頻飛，  
六條亟秉。勇此仁義，行茲寬猛。持印山開，沈黎  
盜靜。取甲無邱，均田不井。懋功賜爵，上將賞官。  
軍中受詔，塞外登壇。方屠叅合，更鑿臯蘭。渝川



毒水、燹道、災氛、地亡、都尉、灘悲、使君、谷寒、無日、  
山空、足雲、北風、吹旄、秋霖、泣軍、遺奠、雙設、銘旌、  
雨布、泌水、同墳、平陽、合墓、悲哀、嗣子、攀號、靡訴、  
慟甚、風枝、悲深、霜露、自此、何世、從斯、幾年、麒麟、  
欲闕、華表中、燃地、形樓、起松、心蓋、圓茫茫、邱壠、  
代代、英賢、

周柱國大將軍長孫儉神道碑

蓋聞放勛立而義和昇重華登而元凱用思皇  
多士既成西伯之功俊德克明乃定南巢之伐



是知惟賢非后弗食。惟后非賢弗父。若夫君臣  
一德啓心。沃心見之。昌甯文公矣。公諱儉。初名  
慶明。恒州高陸人也。北岳天孫之星。燕河帝子  
之國。故多奇節。甚茂華風。高闕圖南。二王齊軫。  
長城拔本。十族分源。高祖太尉北平王光輔五  
君。允釐百揆。恒衛旣從。淮沂其乂。祖豹龍驤。將  
軍恒州刺史。常山刺舉。非無取代之符。龍驤總  
戎。或似平吳之號。父馘年止弱冠。榮終解印。公  
以五常蘊智。六氣資德。乘天則策馬秉靈。降神



則牽狼應象。直心于物。水火恬然。無負于天。雷霆不懼。富貴自取。豈資唐舉之言。聲名有聞。無勞李膺之識。年十八解褐。員外散騎侍郎。尋授輕車將軍羽林監。太祖文皇帝駕馭天綱。苞羅英傑。選公才德。光佐中書。諸葛亮之西歸。玉壘成三分之業。管夷吾之入仕。葵邱有一匡之功。天水黠羌。漁陽羣盜。乃遷秦州長史。防城大都督。封信都縣開國伯。三年。滑州蟻聚。保鄣沉命。靡旗亂轍。乘冰渡河。丞相大行臺授假節撫軍。



行滑州刺史。大統元年授持節西夏州刺史。加散騎常侍。郅支抱馬。如聞耿秉之戰。單于願識。似畏王商之威。五年遷使持節鎮東將軍都督東北三夏諸軍事。西夏州刺史。增邑千戶。改伯爲公。旣而江漢遼遠。車書寂寞。蜀主的顱。未出檀溪之水。秦王飛雉。猶向南陽之城。六年以公爲使持節都督三荆二襄南雍平信江隨郢淝十二州諸軍事。荊州刺史。東南道行臺僕射。楚城隣境。實有讓田。吳人對營。無妨贈藥。部內屬



城爲人所訟。公遂集文武肉袒自罰。兄弟不讓。延壽責躬。吏民有過。翁歸引咎。天子異之。璽書勞問。贈賄加幣。王人接踵。大丞相書云。此之美事。耳目之所未經。歎賞無極。故遣專使。公善于撫馭。長于接引。山藪無棄。苞苴不行。示人赤心。與人顏色。盜不敢發。民不忍欺。至是將校耆老于州城之南。起清德之樓。勒賢臣之頌。杜鎮南之作牧。當世樹碑。竇車騎之臨戎。生年刻石。方之今日。彼獨何人。于豈戶口日增。荒萊畢墾。華



實紛敷。黔黎茂豫。但恐哀職有闕。待公而補。鼎  
飪未和。須公而正。是以漢陰民望。荆南杞梓。竝  
皆上書詣闕。連名乞留。河內之借寇恂。更慙謁  
帝。交州之請士燮。還著上表。九年授車騎大將  
軍。儀同三司。十二年除大行臺尚書。仍爲大丞  
相。司馬以公識度嚴明。志節清儉。遂改公名儉。  
字慶明。非關書月。詎待看碑。幸得千畝不同。二  
山無廢。十三年加開府餘官如故。十四年除尚  
書右僕射加侍中。進驃騎大將軍。居上星執法。



在文昌之位。以公才望兼而有之。十五年更除  
東南道行臺僕射都督十五州諸軍事。行荊州  
事。十六年大丞相總十六軍。尅清河洛。公又中  
分麾下。叅謀幃幄。高選霸僚。公爲長史。其年加  
都督南道三十六州諸軍事。餘官如故。南陽文  
學更遇王基。章華袞衣。還迎郭賀。昔日伐蜀之  
謀。張儀與秦昭計合。平吳之利。羊祜與晉武意  
同。太祖始定成都。卽有江陵之志。公密獻其策。  
懸符深旨。糧運久積。梯衝立備。一戰而舉。鄢郢。



再戰而燒夷陵，遂得席卷三荆，此又公之勲也。詔賞奴婢三百口，太祖與公書云：由公立計，果如所謀，令公作鎮江陵，以安蜀地。後魏二年，改武川、昌甯郡爲開國公，歷陽居民非惟景丹之封曲逆戶口，豈但陳平之國？其年授大將軍，太和中，曹真于府內受冊，元封之末，衛青于軍中卽拜公之此比。綽有餘榮，詔曰：吳人未復，須助謀謨。今使梁王兵馬受公節度，三年加都督，東南道五十二州諸軍事，增邑萬戶，維周革命，光



宅欽明作貳天官。允諧邦治。元年授小冢宰。保定二年治蒲州刺史。檢校六防諸軍事。四年治襄州。仍授柱國大將軍。餘官如故。秩登四岳。階平六府。豈不功重昭陽。名高蔡賜。控馭五十州。風行數千里。拔園葵而去織婦。無三惑而絕四知。一室之中。未免虛白日膳之資。三杯而已。詔賜繒綵一千段。粟麥二千斛。天和元年陝州刺史。都督八州二十防諸軍事。解荊州總管。餘悉如故。路出王宮。城臨河曲。戍清陝右。高視棠陰。



部領宴煩、晦明爲疾、天和四年謝病、故京薨于  
私第、春秋七十有八、鑾蹕降臨、軒懸輟樂、九旒  
龍旆之錫、三河騎士之送、詔贈太保、涼夏靈銀  
長河鄴甘瓜十州諸軍事、涼州刺史、謚曰文公、  
狀貌邱墟、風神磊落、玉山秀立、喬松直上、烟霞  
之涯際莫尋、江海之波瀾不測、少遭荼苦、在山  
服終、攀栢樹枯、侵松獸死、盡忠事國、竭力從政、  
其門如市、其心若水、奇策密謀、百僚仰止、忠貞  
亮直、明王敬焉、至如風后陰陽之占、力牧星辰



之度魏公子之兵書李將軍之射法莫不成誦  
在心取爲昔用居常服翫或以布被松牀盤案  
之間不過桑杯石鼎遺令山陵一無所用公私  
贈襪竝不得受止依太祖陵側無忘事君墩等  
兄弟竝至性善居喪號慕墳塋奉遵遺訓是以  
衛青之塚仍陪漢武之陵管仲之墳卽接齊桓  
之墓天和六年天子以四海未甯三方鼎峙有  
懷將帥之志言念封疆之臣旣畫雲臺乃題麟  
閣更贈公爲鄆國公邑五千戶追崇列辟事極



神魂再改銘旌，恩隆封墓。公在民留愛，身後見  
思。吉日良辰，郊祠野祭，儀同趙超等六百九十  
七人表求立廟。陳請象魏，有詔許焉。柱棟杏梁，  
綠墀青瑣，按歌會舞，鳳蓋霓裳。南浦送而行雲，  
東風颺而零雨。是知漢陽郡前，非徒武侯之廟。  
臨淄城下，豈獨樂公之社。嗚呼哀哉，乃爲銘曰。  
道鍾屯剝，世屬雲雷。地軸左轉，天關北開。容車  
周室，繫馬秦臺。乃齊七政，爰答三才。烈祖燮諧，  
九龔梁棟。取才逢獵，求賢入夢。匡贊官雲，謀猷



紀鳳律定公族珪分職貢乃惟嗣德寔秉英靈  
身圖斗宿面繞樞星青衿敬業童子離經信陵  
虛左干木分庭忠孝純深樞機周密孔光不言  
曹叅勿失溫席扇枕承顏悅膝凍浦魚驚寒林  
笋出肅肅風政沉沉器局直似貞筠溫如瑞玉  
清不置水明非舉燭馬願如羊金須似粟上將  
克昇元戎旣序夏陽三捷夷陵一舉憑軾下齊  
陵江入楚鼎反厯室鐘歸大呂六卿咸事天官  
是司二南作伯棠陰實治清風有頌綠竹聞詩



贈行之冊。超然帝師。昔侍蘭苑。今陪杏林。死生契濶。無違一心。風雲積慘。山陣連陰。陵田野寂。松逕寒深。夏嬰之隴。僑玄之墓。馬見千年。車回三步。左無長樂。前非武庫。直望高碑。增悲行路。

周柱國大將軍紇于弘神道碑

公諱弘。字廣略。原州長城縣人也。本姓田氏。虞賓在位。基于揖讓之風。鳳凰于飛。紹于親賢之國。論其繼世之功。則狄城有廟。序其移家之治。則長陵有碑。况復高廟上書。小車而對漢主。聊



城祭鳥。長岳而驅燕將。公以胎教之月。歲德在寅。載誕之辰。星精出鼎。是以月中生樹童子。知言水上浮瓜。青衿不戲。而受書黃石。意在王者之師。揮劍白猿。心存霸國之用。魏永安中。任子都督翻原州城。受隴西王節度。于昔洛邑亂離。當途危逼。禮樂征伐。不出于天子。舉賢誅暴。實在于強臣。太祖文皇帝。始創霸功。初勤王室。秣馬蒐乘。誓衆太原。公仗劍轅門。粗謀當世。隨何遠至。實釋漢帝之憂。許攸夜來。卽定曹王之業。



永熙中奉迎魏武帝入關封鶉陰縣開國子邑  
五百戶太祖以自着鐵甲賜公云天下若定還  
將此甲示寡人白水良劍罷朝而贈陳寵青驪  
善馬迴軍而賜李忠並經輿服足爲連類大統  
三年轉帥都督進爵爲公十四年授使持節都  
督原州諸軍事原州刺史仙人重返更入桂陽  
之城龍種復歸還尋白沙之路公此衣錦鄉里  
榮之侍從太祖戰河橋復弘農解華山圍平沙  
苑陣每有元勲常蒙別賞太祖在同州文武並



集號令云、人人如紇于弘、盡心天下、豈不早定、  
卽授車騎大將軍儀同三司、前魏元年、轉驃騎  
大將軍、開府、所連猶遠、卽受冠軍之侯、沙幕未  
開、元置長平之府、梁信州刺史蕭韶甯州刺史  
譙淹等猶處永安、稱兵漁陽、公受命中軍、迅流  
下瀨、遂得朝發白帝、暮宿江陵、猿嘯不驚、雞鳴  
卽定、西平反羗、本有漁陽之勇、鳳州叛氏、又習  
仇池之氣、公推鋒直上、白刃交前、萬死一決、凶  
徒多潰、身被一百餘箭、傷肉破骨者九瘡、馬被



十槩露布申上。朝廷壯焉。葛屨糾糾。魏有去舊  
之歌。零露瀼瀼。周受惟新之命。乃進爵封鴈門  
郡公。食邑通前二千七百戶。保定元年。授使持  
節。都督岷州諸軍事。岷州刺史隴頭流水。廷望  
秦關。川上娥眉。猶通蜀道。公不發私書。不燃官  
燭。獸則相負渡江。蟲則相銜出境。四年。拜大將  
軍。餘官如故。衛青受詔。未入玉門之關。竇憲當  
官。猶在燕山之下。公之此授。差無慙德。渾王叛  
換。梗我西疆。巖羗首竄。藩籬携貳。公受賑于社。



偏師遠襲揚於龍涸。繫馬甘松。二十五王。靡旌  
亂轍。七十六柵。鶉奔雉竄。旣蒙用命之賞。乃奉  
旋師之樂。天和二年。被使南征。帶甲百萬。舳艫  
千里。江源水起。海若乘流。船官之城。登巢懸爨。  
吳兵習流。長驅戰艦。風灰箭火。倏忽凌城。公以  
白羽麾軍。朱絲度水。七十餘日。始得解衣。朝廷  
以晉尅夏陽。先通滅虢之政。秦開武遂。始間吞  
韓之謀。是以馳傳追公。以爲仁壽城主。齊將段  
孝先斛律明月出軍定隴。以爲宜陽之援。公背



洛

水而

面熊山。陣中軍而疎行首。乘機一戰。宜陽

銜壁。增封五百戶。進柱國大將軍。司勳之冊也。

建德元年拜大司空。二年遷少保。姬朝三列少

保爲前。炎正五官。冬官爲北。頻煩寵命。是謂賢

能。三年授使持節都督襄郢昌豐唐蔡六州諸

軍事。襄州刺史。江漢之間。不驚雞犬。樊襄之下。

更多冠蓋。旣而三湘遼遠。時遭鵬入。五溪卑濕。

或見鳶飛。舊疾增加。薨于州鎮。天子畫凌烟之

閣。言念舊臣。出平樂之官。實思賢傳。有詔贈某



官禮也。卽以四年四月二十五日歸葬于原州。  
高平之鎮山，屬國立甲，輕車介士，一依霍驃騎  
之禮。衛將軍之塋，嗚呼盛哉。公入仕四十五年，  
身經一百六戰，通中陷刃，疾甚曹叅。刮骨傳藥，  
事多關羽。而風神果勇，儀表沉雄，學不專經，畧  
觀書籍，兵無師古，自得縱橫。青烏甲乙之占，白  
馬星辰之變，九宮推步，三門伏起，天弧射法，太  
乙營圖，竝皆成誦在心。若指諸掌，虜青犢之兵，  
甚有秘計。燒烏巢之米，本無遺策。西零賊退，屈



指可知。南郡兵廻。插標而待。常願執金鼓而問  
吳王。橫琱戈而返齊地。有志不就。忠貞死焉。世  
子恭等孝惟純深。居喪過禮。對其苦寢。則梓樹  
寒生。聞其悲泣。則巢禽夜下。嗚呼哀哉。乃爲銘  
曰。

天齊水合。日觀山連。兵強東楚。地遠西燕。五卿  
咸正。三王竝賢。靈龍更起。燧象還燃。自天之德。  
乃祖乃父。維岳降神。生申及甫。北門梁棟。西州  
雲雨。勇讐燕城。名題漢柱。公始青矜。風神世載。



猛獸不驚家禽能對劍學千門書觀六代有竭  
忠貞無違敬愛乃數軍實乃握兵謀澆沙成壘  
聚石成圖風雲順逆營陣孤虛靈雨鉦鳴燿火  
飛狐淮陰受冊車騎登壇公爲上將有此同官  
下江燒楚上地吞韓推功玉案定策珠盤天有  
三堦公承其命國有六卿公從其政台曜偕輝  
槐庭重映匡贊七德謨猷八柄腹滿精神心開  
明鏡伏波受賑樓船推轂東道未從南征不復  
飲丹有井澆泉無菊功存柳林身在櫛木移茵



返葬提樞山行芻靈隴水哀挽長城山如北邙  
樹似東平松門石起碑字金生眇眇山河熒熒  
脣子泣血徒步奔波千里孝水先枯悲雲卽起  
世數存歿哀榮終始

周大將軍崔訖神道碑

公諱訖字士約博陵郡安平縣人也昔者華陽  
之野降龍首之神烈山之都啓龜文之繇匡周  
則盟津有會佐夏則龍門始鑿西遊則起家秦  
相東入則載世齊卿備乎史籍可得言矣祖辨



平遠將軍武邑郡守父楷散騎常侍光祿大夫  
殷州刺史竝厲風霜俱張鋒穎邸史疊迹官曹  
凜然是謂鮑恢都官百城振懼葛豐握節京師  
歛手公特稟英靈偏鍾山岳雄姿俊茂冒目疎  
朗觀虎于檻齟髮不驚稱象于船勝衣能對至  
于拉虎捭熊摧班碎掌忘歸繁弱落鴈吟猿故  
得氣蓋關中威申河外解褐領軍府錄事轉諮  
議叅軍皆當塗失御政在權門始論函谷之兵  
卽起韓陵之戰太師賀拔勝作牧西荆公爲假



節冠軍將軍防城都督及南陽失守卷甲奔梁  
樂毅羈旅猶思燕路陳軫愴懷終戀秦聲幸值  
和隣言歸舊國授衛將軍都督封安昌縣開國  
子食邑三百戶弘農尅復沙苑揮鋒進爵爲侯  
增邑并前一千一百戶信珪則更受司勳穀壁  
則還輸典瑞鐵馬有河橋之戰戈船有汾水之  
兵除京兆太守移民下邑未學邊韶走馬章臺  
不同張敞遷帥都督持節撫軍通直散騎常侍  
大都督尋遷使持節車騎大將軍儀同三司都



官尚書定州大中正五曹奏事。有朱穆之忠九  
品論人。見楊喬之直。改封安國縣侯益邑。合前  
一千四百戶。賜姓宇文。改名爲訖。漢王改婁敬  
之族。事重論都。魏后變程昱之名。恩深捧日。遷  
驃騎大將軍。開府儀同三司。加侍中。竇憲連官。  
單于之寶鼎可致。張寬固位。渭橋之流星可識。  
司木七工。旣掌邱陵之賦。司會六典。乃均邦政  
之才。居官得人。于斯爲盛。進爵爲公。改封萬年  
縣。通前二千四百戶。除隴州刺史都督隴州諸



軍事隴坻路遙秦川望遠鄧仲華之不去馬文  
淵之願歸尋除涼州刺史總督河西甘瓜諸軍  
事地似伏龍城如飛鳥燉煌實錄宛在胷襟王  
門亭障無勞圖畫有馬如羊不以入廐有金如  
粟不以入懷柱國齊王今上之介策龔行薄伐  
問罪河陽以公爲行軍長史叅謀帷幄中軍之  
司旣舉魏絳上卿之佐實用荀林以公方之差  
無慙德除使持節大將軍大都督崇德安義建  
忠九曲安樂三泉伏流周張平泉固安蠻通谷



凡十三防禦熊和中三州黃蘆起谷王晏供超  
牽羊溫狐交河大嶺避雨木柵寺一十戍諸軍  
事崇德防主宜陽上地更有秦兵熊耳山前還  
逢積伏用是連營函谷獵騎黎陽威振兩河名  
陵三晉改封安平縣公淮陰一國韓信之故人  
戶牖萬家陳平之鄉里公此衣錦足爲連類建  
德四年正月十日薨于長安之永貴里私第春  
秋六十有四詔贈鄜延丹綬長五州諸軍事敷  
州刺史謚曰莊公禮也卽以其年二月二十四



日葬于京兆平原鄉之吉遷里。北陵追遠。大司馬有賜綬之恩。西京贈行。冠軍侯有詔葬之禮。嗚呼哀哉。世子儀同弘度。生事以禮。死葬以禮。愛親有王祥之孝。同氣有姜肱之睦。百行之本。于斯備焉。况復松楸深沉。旣封青石之墓。邱陵標榜。須勒黃金之碑。乃爲銘曰。

華陽之神。厲山之祖。鳳野佳周。龍門佐禹。日浴溟池。山浮海浦。甫穆霸國。營邱樂土。膺斯宗邑。承此壤王。移封東武。就君安陽。中軍節目。鎮北



鋒芒商飈獵草電火驅霜公之輪奐繼體貞幹  
儀表邱墟風神墻岸孝有至德忠能匡贊不廢  
橫琴無妨欹案旣班三事又貳六官衛青受詔  
韓信登壇長城馬窟廣武兵欄軍吏無犯營民  
不寒乃用六謀乃論三策城壘向背星辰主客  
劒起沉犀弓開伏石楚后讓盟秦君還璧百齡  
危脆千仞摧藏諸侯地裂邊將星亡輕車騎士  
玄甲黃腸社如齊地廟似桐鄉銘功贊德碑闕  
相望



周車騎將軍賀婁慈神道碑

昔者軒邱命氏初分兄弟之姓。若水降居始建  
諸侯之國。自是以官爲族。因地爲宗。水派枝分  
其可知矣。公諱慈字元達。本姓張。清河東武城  
人也。仕于周。張仲爲孝友。謀于晉。張彥爲賢臣。  
韓有開地。則五世強國。趙有孟談。則三卿不戰。  
祖慶少習邊將。仗智勇。雖復五車竹簡。不取博  
士之名。一卷兵書。卽以將軍自許。角端在手。必  
無齊魯之侵。蓮花插腰。甚得蛟龍之氣。爲車騎



大將軍儀同三司散騎常侍霸城縣開國伯贈  
河州刺史父璨公子公孫有鎡基于天下良弓  
良冶有世業于家風書則百家可知劒則千人  
可敵三槐以鴈鼎象物知其神姦五等以桓珪  
班瑞守其宮室君以才望兼而有之終于使持  
節車騎大將軍儀同三司散騎常侍武定縣開  
國公贈河州刺史惟公秉山岳之靈受星辰之  
氣年在髫髮甫就勝衣竹馬來迎已知名于郭  
伋羊車在道卽見賞于王澄豈直童子明經書



生說卦而已。至如禪河清論。秋水高談。故以辨  
折龜林。聲馳鹿野。國家官族。君爲首姓。起家車  
騎。大將軍儀同三司。襲爵爲公。增邑合一千六  
百戶。弱冠登朝。傳呼甚寵。漢魏台鼎。故無此比。  
中朝方伯。罕有其年。大冢宰任總機衡。是勤王  
略。惜君忠壯。委以爪牙。乃領左廂親信。出爲梁  
州防主。華陽西極。漢水東流。巴濮旣甯。沈黎卽  
靜。保定四年。王師北伐。以君驍勇。被召將兵。師  
下宜陽。身登函谷。將燒白馬之城。以覆烏巢之



壘。旣而中途甚雨。未獲圍原。軍師聞喪。不成侵  
宋。柱國趙王。今上之第九弟也。文則河間。上書  
武則任城。置陣。作鎮。岷邱。揚旌。錦水。白虎之俗  
難安。黃龍之盟不定。以君智略。入佐中權。天和  
元年。授使持節大都督。治柱國總府司錄。仍轉  
司馬。餘官封如故。相如西喻。鏤石於靈山。武侯  
南征。浮船于瀘水。方之今日。彼獨何人。九品課  
工。爲上之下。四年入朝。歸事宰旅。卽受載師大  
夫。將命齊國。尋盟出境。卽用和鄰之儀。入國聞



喪仍從會葬之禮。可使南面。此之謂乎。尋以本官入治軍正。至如渭水兵書。在心爲志。軒邱陣法。聚石成圖。旣得師不疲勞。兵無怨讟。入陪中禁。更領儀同。邸客城池。門闌戶籍。咸資巡警。竝用司存。帝城近臣。公室密戚。如逢司隸。似畏都官。旣而孤城鄭嫗。不相其年。巴水涪翁。不醫其疾。春秋三十有三。奄捐官舍。呂子明之疾甚歎軫。吳王。阮元瑜之長逝。悲深魏主。有詔贈某官禮也。以建德四年三月日歸葬於河州苑川郡。



之禁山公六郡良家西河鼎族地壯金行人雄  
塞氣兵書七卷河水浮來射法三篇天弧夜下  
鋒旗不息刁斗恒驚猶得馬上讀書軍中習禮  
太史子義善於謀策諸葛公休長於撫馭四代  
儀同三司七世河州刺史鐘鼎成列冠蓋連陰  
所謂生爲貴臣死爲貴神者也但以遊魂久客  
反葬途遠道阻山長妻孤子幼哀聲滿野愁氣  
連雲况復松檟飄飄方臨武威之戍邱陵迴遠  
直對臨洮之城馬援亡于武溪尸柩返于魏里



梁鴻死於會計。妻子歸于平陵。嗚呼哀哉。崎嶇  
遠矣。昔者繁昌祠前。卽有黃金之碣。德陽墓下。  
猶傳青石之碑。是謂勒功。乃爲銘曰。

七葉佐漢。五世相韓。忠臣入仕。孝友當官。青城  
仙洞。黃石祠壇。臺堪走馬。書足迴鸞。武定風飈。  
霸城嚴肅。竝馳雙傳。俱分兩竹。重世刺舉。連鑣  
袞服。草靡青邱。風馳赤谷。世不乏賢。挺茲上嗣。  
孝有三德。忠無二志。劒足身挺。書堪面試。旌節  
旣乘。高蟬且珥。龜轉卽函。蛇盤綬笥。左右將軍。



前後常侍繼踵五侯，因循三事旃九坂。艫舳  
雙流還驅水馬，更引金牛。江波錦落火井星浮，  
樽酒望帝安歌。蜀侯受賑河陽，偏師洛浦署陣  
成臯，連旗廣武。朝兵滅竈，夜營多鼓。箭起六麋，  
鋒摧九虎。倏忽人世，俄然今古。崇發兩星，鑒驚  
二豎。遊魂通夢，言反舊塋。紫泥賜冊，黃腸贈行。  
途登石紐，路入金城。寒關樹直，秋塞雲平。劒埋  
合柱，書藏鑿楹。武侯爲廟，樂公爲社。雲蓋低臨，  
霓裳紛下。碑枕金龜，松橫石馬。永矣身世，留名



華夏

周上柱國宿國公河州都督鼂威神道碑

公諱威字某河南洛陽人也舊姓辛隴西人基  
若水之源纂商邱之畀邑于大亳實定其居封  
于小辛乃成其姓是以三川被髮辛有得見事  
之機八卦占爻辛廖有知人之鑒佐治以東都  
上將魏帝解衣武賢以西國功臣漢王推轂祖  
大汗渭川刺史考生河州四面總管大都督隴  
右貴臣河西鼎族公侯踵武岳牧連鑣竝得聲



振長榆名雄高柳公秉靈山岳誕載星辰結髮  
凝然齡年成德澄波萬頃建標千仞鋒穎旣高  
光芒已遠青衿學劍旣爲人主所稱童子論兵  
卽在中軍之策永熙元年入仕蒙授直盪都督  
太祖文皇帝雪舊君之耻連西伯之功始裂鴻  
溝初登函谷公擢衣沐髮杖劒轅門撤洗足而  
相迎下賓階而顧問自此卽居帳內仍爲直寢  
授甯遠將軍羽林監白土縣開國伯邑五百戶  
大統元年從迎大駕進爵爲侯增邑三百戶加



冠軍將軍散騎常侍、轉大都督。公善于用兵，長于撫御。自攻洛陽，定弘農，戰河橋，平沙苑，冒刃衝鋒，前無橫陣。況以弦木六鈞，函犀七屬，門多懸冑，射必中鞍。山積器械，谷量牛馬。軍吏計功，司勲賞策。授使持節、銀青光祿大夫、進爵爲公，增邑八百戶。昔者受律赤符，韓信當乎千里。治兵白帝，張飛擬于萬人。比跡今日，公之謂也。五年，授使持節、都督揚州諸軍事、揚州刺史。浮于江海，達于淮泗，篠簜旣敷，瑤琨卽序。十三年，授



車騎大將軍儀同三司尋遷驃騎大將軍開府  
仍賜姓普屯卽爲官族入陪武帳出總戎韜置  
府于陽關張旃于瀚海故得上書于漢卽用同  
宗爭長于周還無異姓十六年授鄜州諸軍事  
鄜州刺史公頻領兩牧風政神明虎去西河梟  
移東郡河湄瑞氣特表廉平鄜祀神光偏明正  
直及乎魏終天祿周受惟新明命已遷彝倫或  
革周元年改授大將軍枹罕郡開國公增邑一  
千戶軍中受詔非論北伐之兵大將登壇無待



東歸之策。置陣太平。開陰晉之道。連兵廣武。納  
滎陽之城。校戰丹山。移營白壁。莫不勇冠三軍。  
名凌五將。保定四年。授甯州總管。掌其北門。既  
爲鄭國所委。捍其西鄙。無懼秦亭之逼。是以築  
平綱之城。衛人拱手。成滎波之澤。梁氏寒心。朝  
廷與公有內外之親。令公從戚里之貴。乃以魏  
文帝女爲公夫人。遂得長門之左。別開公主之  
園。濯龍之傍。更築王姬之館。五年。被徵入京。拜  
少司馬。期于司武。以公爲魏絳。佐于中軍。以公



爲荀首。豈直謂之鵠火。稱之緇雲而已哉。其年  
被使領兵出西涼州。奉迎突厥皇后。紀裂。繻來  
卿爲君逆。稱族而行。尊君命也。天和元年授柱  
國拜大司寇。楚之柱國。方之南火。軒之司寇。譬  
以西雲。總授于公。能官人也。建德二年授少傅  
四年授甯州總管都督七州諸軍事。卽爲河州  
大中正。公之桑梓。本于此地。再爲連率。頻仍衣  
錦。襄城龍種。更及池臺。桂陽仙人。還歸鄉里。故  
老親賓。酣歌相慶。安車駟馬。天下榮之。宣政元



年授上柱國。更加少傅。配于上相。卽陪立扈之  
圖。居于京師。實有圯橋之策。改封宿國公。食邑  
并前五千戶。射鴻舊圃。舞鶴餘城。旣浮酸棗之  
河。聊對淇園之竹。來朝建章。則天子降席。出遊  
咸里。則郡公下堦。是以行滿天地。名聞四海。方  
當光輔五軍。叅謀七政。天厲弗戒。薨于所居。春  
秋六十有九。柳莊告殯。傾社稷之臣。鄭僑云亡。  
得諸侯之禮。詔贈某官。謚某公。禮也。以今開皇  
元年七月某日。反葬于河州金城郡之苑川鄉。



山行隴底地入塞源望積石以緣河臨崆峒而  
下坂。玄甲黃腸崎嶇亭郭。及云奠徹方勞榆沈  
若夫樹反壤也。封夏屋焉。終須潁川之碑。乃見  
華陰之碣。世子儀同永達孝性有聞居喪得禮  
嗟海變而田成懼山飛而地絕勒石墓田仍銘  
云爾。

少典之孫玄王之子虹貫于月金承于水降及  
于周公侯復始風俗氣候山川表裏河連積石  
山帶崆峒秦亭北上漢使西通金行氣壯地勢



人雄稜稜高節凜凜疎風祖考藩屏濁河清渭  
兩地謨明雙流光賁水無別色雲無異氣爲吏  
爲民惟懷惟畏公之嗣世實秉英靈降神中嶽  
迴文列星鸞翔鳳顧珠角山庭臣深義本子極  
天經洛城戰陣河橋旗鼓箭飲石梁劒燃銅樹  
英麗六廩俱抽雙虎王門開郡陽關置府再爲  
上台兩爲少傅模範帝師經綸國步允襲峻德  
欽明審論不吝車茵誰言溫樹天道茫昧年齡  
倏忽上將星開功臣鼎沒九原陵阜三河甲卒



地險龜林，營危馬窟。西州永別，北闕長辭。山張  
虛葢，野祭空帷。陵原地迥，松路風悲。銘于碣石，  
勒以貞龜。

周兗州刺史廣饒公鄭常神道碑

唐朝以元凱竝進，十有六人。周室以昭穆先封，  
十有五國。發源纂胄，葉派枝分。開國承家，珠聯  
璧合。是用克明峻德，思皇多士。盛德有後，公其  
裕哉。公諱常，字子元，豫州滎陽人也。周宣中興，  
然後樹賢建戚。鄭武有國，然後保姓受氏。荆衡



之賦千乘。莫敢加兵。號會之封十城。翻爲獻邑。  
况復郊門致騎。先迎內史之賓。南宮旦朝。獨識  
尚書之履。祖思慶建威將軍山陽太守建威取  
曹仁之號。可以定名。山陽有王暢之賢。足觀風  
俗。考項銀青金紫方。于溫羨傳祇鎮南征東。比  
于劉弘荀顗。報功之冊。則槐路是儀。贈行之典。  
則荆河惟牧。公弱齡早慧。幼學夙成。立必正方。  
言無勦說。青衿智勇。卽埋雲夢之蛇。童子仁心。  
已愛中牟之雉。始遊庠塾。不無儒者之榮。或見



兵書遂有風雲之志。出忠入孝，事盡于心，修身立名，理窮于性。大統三年，起義華陽，先登廣武，浮潛逾沔，入渭亂河，蒙授永安縣開國男，輔國將軍，自爾長從太祖，人爲帳內都督，河橋接戰，秋水則三月不流，洛城揮鋒，金墉則一月路斷。西京不賓，羗戎侵軼，城如飛鳥，地有伏龍。公以金僕裁抽，靈鉦整舉，蜂目已奔，狼心遂革。遷平東將軍、帥都督。十五年，襲父封，魏昌縣開國伯，傳大都督。魏後三年，授使持節、車騎大將軍、儀



同三司黃權受詔嘉其入魏之功竇憲當官賞其平戎之策公之此授勲庸著矣進爵廣饒縣開國公邑五百戶保定三年授都督羅州諸軍事羅州刺史仍領金州兵馬應接上庸公于文谷路溪澗崢嶸巖崖豁嶮山窮水斷馬束橋飛中埒旣開雙城卽欵往者申息盡掩江黃無援涔陽極浦亟犯風塵夏首西浮頻遭鋒鏑公以伏波受賑樓船誓衆入橫江之陣進下瀨之兵越客文身湛盧終去吳人長鬣舳舻遂遠建德



四年授使持節開府儀同大將軍公孫敖下光  
祿之塞。諸葛誕勒九都之山。公之處焉。差無慙  
德。四方雜俗。天下殊風。以君廉能。使兼觀察。馳  
傳擁節。揚旌持斧。旣乘驄馬。仍被繡衣。羣盜累  
足。貴戚歛手。鄉亭留宿。幸無歸忌之疑。公車奏  
事。甯有反支之日。是使陽球司隸。無所申威。鮑  
恢都官。因人成事。高祖武皇帝。以仲春誓衆。甲  
子濟河。公仗劒六軍。披圖八陣。譬彼張遼。前鋒  
而報魏主。方之耿弇。先戰而待蕭王。及乎九州。



迫同四隩。旣宅遂得功。叅勇爵名人。司勲授上  
開府。增邑五百戶。加以舉功行賞。推恩分邑。兼  
乘而反。光乎譙郡之城。載寶而歸。照于臨漳之  
水。卽日賜姓宇文。與國同族。婁敬上書于鹿輅。  
項伯舞劒于鴻門。公之此榮。足爲連類。以公績  
著屯險。誠貫風霜。其年授使持節督東徐州諸  
軍事。徐州刺史宣政元年。授都督南兗州諸軍  
事。南兗州刺史。作牧濟河。風行于雷澤。建旗海  
岱。化被于淮沂。襜帷八境。貪殘者解印冕旒。從



政仁義者郊迎豈直白石開渠青鹽換粟祥雲  
入境行雨隨軒而已哉。在任邁疾薨于方鎮皇  
甫嵩監御。斯牧賢能。刺史荀中郎連率此則中  
興方伯英聲茂實公之有焉。詔贈某官謚某公  
禮也。以大象二年十一月十日歸塋于滎陽之  
某山舊墓。九原悽愴。趙文子其何言。駟馬悲鳴。  
滕成公其已遠。若夫勒鼎刊碑。銘功頌德。陳其  
令範。必在生前。嗟乎此之樹碑。異乎洙泗之水。  
此之勒石。異乎燕然之山。嗚呼哀哉。乃爲銘曰。



高陽之子、少典之孫、蒼林遠邁、若水遙源、公侯  
復始、鍾鼎逾繁、承基纂胄、建國開藩、我壯我武、  
旣公旣侯、緇衣出鄭、卿士歸周、魚陵北上、滎澤  
東流、河移酸棗、雨粟陳留、祖守南邦、考鎮東郡、  
兩龜爲印、雙虵結綬、日察陰陽、星占長柳、是曰  
世載、其名不朽、事親之道、孝以立身、事君之道、  
忠以立仁、今君嗣德、一此君親、如松之茂、如竹  
之筠、功參荆棘、職主兵戈、北臨青嶺、南通白波、  
直雲橫塞、長星渡河、陳開沙斷、師移竈多、舉功



行賞封疆受位宮室鏤珪山河分地決勝千里  
謀深計秘建武功成名連星次建旛濟漯擁節  
龜蒙旣蠶桑土實撫梧桐野無異器河無別風  
吳亭楚塞莫敢彎弓倏忽身世俄然松檟路轉  
銅魚山迴石馬武侯之廟樂公之社望此高碑  
悽然淚下

周隴右總管長史贈少保豆盧公神道碑  
君諱永恩字某昌黎徒河人本姓慕容燕文帝  
旣之後也朝鮮微子之封孤竹伯夷之國漢有



四城秦爲一侯。其先保姓受氏，初存柳城之功。開國承家，始靜遼陽之亂。自天市星妖連津兵覆。尚書府君。改姓豆盧，筮仕于魏。祖代左右將軍。魏文皇帝直寢，父長少以雄畧知名。不幸早世。周朝以公兄弟佐命，義存追遠。保定二年，有詔贈柱國大將軍涪陵郡公，是知春雨潤木，自葉流根。西伯行慶，推存及歿。公以山岳精靈，星辰秀異，氣侔鍾鼎，聲感風雲。觀于秦兵尚稱童子。對于楚戰猶在青衿。太祖文皇帝乘時撥亂。



奄有霸業。潁州從我。舊愛無渝。春陵故人。相知  
惟眷。晉泰二年。關西建義。授殄寇將軍。奉迎大  
駕。賜封新興縣伯。邑五百戶。開新安之鄉。還移  
揚僕之關。解弘農之圍。更入劉昆之郡。援桴併  
轡。並預前驅。大統三年。有沙苑之戰。四年。河橋  
之役。介冑蟻虱。戎馬生郊。公靈變愈長。風飈更  
勇。隱若敵國。差強人意。授龍驤將軍。中散大夫。  
八年。授直寢右親信都督。尋轉大都督。加通直  
騎散常侍。十六年。授使持節。車騎大將軍。儀同



三司魏元年授驃騎大將軍開府儀同三司鄧  
騭以漢朝親戚始授中台黃權以魏國功臣初  
登上將公頻煩寵授朝野爲榮三年都督成州  
諸軍事成州刺史尋加侍中外總連帥威振百  
城內叅常伯榮高八舍于崑隴坻黠羌皆穿上  
谷榆中羣賊或聚漁陽公卷甲星馳長驅千騎  
迴洛兇徒望風草靡瓜州豪傑束手歸軍後魏  
元年改封龍支縣侯三年朝廷使大將安政公  
隨突厥吐谷渾歸國河鄯二州屬當路首公領



騎八千以爲戎防。南通丹粟，西望白蘭，開塞無虞。公之勲也。周元年，授都督鄯州諸軍事。鄯州刺史，其年改封沃野縣公，增邑千戶。二年，授隴右總管府長史。武成元年，都督利涉汶三州諸軍事，利州刺史。五年，兵破文州，陽陣蠻仍平。瀘水以保定元年將兵破巴州，恒猥獠度瀘。五月，葛亮有深入之兵。長坂九迴，王遵有忠臣之路。霜電不驚，水草無乏，天幸將軍斯之謂矣。其年授司會，八法斯掌。九賦是均，事總歲成。功叅日



要三年還授隴右總管府長史。公屢弼英蕃。頻相大府。北海入朝。仰以對問。東平謁帝。因而定禮。遂使馬首懷燕。不無樂毅。蕃臣擬漢。或多田叔。兄楚國公。以叅和挹讓。莊贊樂推。建國開都。奄荒南服。求以先封。武陽郡三千戶。益公沃野之封。朝廷以兄弟相讓。不無前史。推恩分邑。有詔許焉。增邑并前。合四千七百戶。旣而六氣相犯。五聲相觸。靈壽不終。遊魂且變。薨于官舍。春秋五十八。詔贈少保幽冀定相等五州諸軍事。



函州刺史謚曰敬公禮也天和元年二月六日  
塋於咸陽洪瀆州大夫墓樹以柏諸侯墳高于  
雉嗚呼哀哉公資忠履孝蘊義懷仁直幹百尋  
澄波千頃留心職事愛玩圖籍官曹案牘未嘗  
煩委戍馬交馳不妨餘裕兄弟公侯國朝親戚  
宜春有湯沐之盛濯龍無流水之譏渭南千畝  
之竹尚懼盈滿咸陽二頃之田常思止足立身  
則十世可宥遺子則一經而已刺史賈逵之碑  
旣生金粟將軍衛青之墓方留石麟乃爲銘曰



朝鮮建國孤竹爲君地稱高柳山名密雲遼陽  
趙裂武遂秦分寶珪世胃雕戈舊勲名稱賓賓  
言謂身文挺此含章降茲岐嶷有犯無隱王道  
正直唯愛唯敬永成悅色枕籍禮闡留連學殖  
策叅帷帳功披荆棘韓陣揮戈齊城憑軾豹策  
乃建龍韜同啟校戰岐陽申威隴坻城壘畫地  
山林聚米上馬諭書臨戎習禮賈復開營廉公  
屈體從容傳會占對造請用此廉平終茲寬猛  
綠林兵息潢池盜靜名振赤山威高青嶺玄猷



浮河飛螭出境災氛生隴毒水侵涇朝傾地鎮  
夜落台星石壇承祀豐碑頌靈渭城高栢昌陵  
下亭須知地市爲讀山銘

周柱國大將軍大都督同州刺史段永神  
道碑

公諱永字永賓東燕遼東郡石城縣零泉里人  
也本姓段昔者昌意陵居初分若水之姓共叔  
出奔始有京城之族西河居士蕃魏而却秦北  
岳將軍威胡而奉晉其後居于北代則先封遼



水備乎史籍、可略而言、祖援鎮西將軍馮翊太  
守父儒平東將軍、持節恒燕朔三州諸軍事、恒  
州刺史、公年裁弱冠、卽值亂離、驅馳關塞之間、  
早有縱橫之志、軍陣方圓、無勞聚米、山川形勢、  
不待披圖、魏正光五年、入仕解褐、殿中將軍、孝  
昌三年、加龍驤將軍、永平二年、授平東將軍、都  
督中延、建義勲謀是先、蒙賞倉泉、縣開國男、食  
邑一百戶、其年淮淝侵軼、南鄙徵兵、公受賑偏  
師、一月三捷、昔張遼奄至、有關文

封



沃陽縣開國伯食邑五百戶進爵爲侯永熙元  
年授使持節車騎大將軍左光祿魏武帝特召  
入任閣內大都督馬武小心侍蕭王于卧内典  
韋忠壯陪魏后于官中于昔賊帥元伯破掠城  
市西自潼函東綿鞏洛京畿大都督請士馬五  
千公曰此賊無他策尋爲鳥散止請五百騎應  
手生擒朝廷賞其謀策百姓喜其除害旣而喪  
亂弘多生民版蕩乘輿西幸宗社北遷公妙識  
玄象深知厯數乃與昆弟謀爲自全斬西中郎



將送首關內，蒙賞昌平縣開國子，食邑三百戶。  
大統元年，授使持節都督北徐州刺史，平寶軍。  
復弘農，戰沙苑，河橋，公竝預先登，身當鋒首，謨  
猷應變，備在司勳，增邑八百戶，通前合二千戶。  
進爵爲沃陽縣開國公，授南汾州諸軍事，南汾  
州刺史。十四年，增邑三百戶，轉大都督。其年授  
車騎大將軍，儀同三司，加散騎常侍。十六年，授  
驃騎大將軍，開府，加侍中，尋受恒州諸軍事，恒  
州刺史。又遷雲州刺史。昔軒邱分族，異姓者十



四人。鄴邑建侯。宗盟者四十國。太祖文帝席卷  
關河。三分天下。潁川從我。並有鄉里之親。新豐  
故人。非無布衣之舊。更立九十九姓。還存三十  
六國。舊胄還姓。爾綿增邑千戶。進爵爲廣城郡  
開國公。尋授文州諸軍事。文州刺史。國家以玉  
門西拒。久勞亭鄣陽關北。牧多事風塵。武城二  
年有詔。進公都督瓜州諸軍事。瓜州刺史。是以  
名馳梓嶺。聲振榆關。無雷畏威。負霜懷惠。保定  
三年。還朝。授工部中大夫。尋遷軍司馬。夏官司。



武待白露而治兵冬官考工紀立雲而授職四年增邑三百戶通前合三千九百戶其年授使持節大將軍都督治左八軍總管軍事朝登上將幕會小卒事涉交接觀釁而返天和四年以本官領小司寇三度有星名天獄八卦有坎象刑書公繁不秋荼嚴無夏日民知約法未肯以獄吏爲尊吏識刑名無敢以死灰相懼又任左廂第三軍總管仍被勅將兵馬北道教習韓信人關卽申軍令陳農受詔仍校兵書豈直六郡



良家五營騎士懸知正正之旗遙識亭亭之氣  
蒙犯霜露旗鼓驅馳俄而遭疾疹至大漸五年  
六月十六日薨于賀葛城春秋六十有八將軍  
死綏三軍行哭都護喪還緣邊追祭九月二十  
三日靈柩至于京師皇帝臨喪百寮赴弔詔遣  
使持節車騎大將軍儀同三司賀拔軌監護喪  
事又遣使持節車騎大將軍儀同三司紇豆陵  
亮冊贈使持節柱國大將軍同華宜敷丹五州  
諸軍事同州刺史謚曰恭公其年十一月五日



葬于京城南高陽原高司里夫人赫連氏兗州  
刺史悅之女年十四適爾綿氏冊拜魯城縣君  
遷濟陰郡君又遷廣城國夫人肅恭令淑儀範  
賢才四德有耀三星增輝三公夫人見于斯矣  
建德元年十二月亡春秋五十有八二年正月  
歸于高司之塋劉荊州之墓合葬於襄水之陽  
衛將軍之陵同穴于廬山之下嗚呼哀哉世子  
岌使持節儀同大將軍領兵部大夫純孝事親  
忠貞事國禮義自立聲名有焉銘曰



軒臺受氏若水降居西城仲肩北陸寘餘山川  
雄烈風俗扶疎昔我關塞沿襲干戈時遭拔本  
世值橫波北封代郡東據遼河地未平一天猶  
薦瘥我公重光繼文踵武總牧三蕃兼治六輔  
雅俗觀風都亭待雨不逢問吏無聞桴鼓公以  
載世挺此令聞孝有三德忠惟一君馬陵釋患  
聊城解紛兵防滿月戰避迎雲長松都尉細柳  
將軍旣牧淮海且藩恒代高壁負關長亭穿塞  
釁鼓司盟

吏不能欺兵無敢背玉關



遺矩、汾海留愛、大將受冊、公昇其壇、六卿咸事、  
公貳其官、夷陵燒楚、上黨分韓、營軍叅合、校戰  
皋蘭、年深厲起、福過災生、上台裂岳、次將傾星  
赤地、悲淚、白虎哀鳴、懸弓靈幕、繫馬塞垆、煙凝  
不動、泉凍無聲、天子愴然、追于贈謚、禮官賜冊  
陪陵、受地印綬、曰策衣衾、曰祔、玄窆就列、黃腸  
在位、自此何世、從斯幾春、樹爲櫨社、陵成谷神、  
詎知雲閣、名在功臣、

周柱國楚國公岐州刺史慕容甯神道碑



昔在殷書。懋賞。周禮議勲。諸侯計功。大夫稱伐。惟師尚父。昆吾載寶。鼎之銘。王命尸臣。榆邑傳琕。戈之賜。故知太上立德。明試以功。存有顯爵之榮。歿有大名之貴。昊天不弔。其惟楚國公乎。可以旌德。景鍾勒勲。彝器式昭盛美。載揚洪烈者焉。公諱甯。字永安。昌黎徒何人也。都尉總六縣之卿。名山稱五岳之佐。燕太祖文皇帝慕容皝。以當世英雄。奄有河朔。趙之南境。且建王城。冀之北土。仍爲興國公。旣皝之苗裔。家世燕隋。



高祖侍中使持節都督中外諸軍事太保錄尚  
書北地王慕容超之世蕃屏王室詳之燕錄可  
得稱焉曾祖尚書府君因魏室之難改姓豆盧  
仍爲官族祖仕魏文成皇帝考早亡朝廷以庸  
勲攸屬恩深追遠保定三年有詔贈柱國將軍  
少師涪陵郡開國公食邑二千戶公稟氣中和  
降祥川岳岐嶷表羈貫之年通禮稱綺統之歲  
夙著奇節勿表大成兄弟分果備知推讓賓客  
解鈴曾無恡色永安元年太宰朱天光魏室元



輔握兵淮右、抗權江南、公肯任別將、便從征伐、自是長城陝右、必先行陣、秦南隴西、每當矢石、摧堅乘勝、莫不前驅、策勲行賞、常居第一、永熙元年、補子都督、并加鼓節軍儀、除桑乾太守、轉補都督、其年以魏皇西幸、奉迎大駕、賜封河陽縣、開國伯、增邑三百戶、俄遷大中大夫、改伯爲侯、增邑合九百戶、仍授使持節都督顯州諸軍事、顯州刺史、四年遷鎮、東將軍金紫光祿大夫、其年秋、河橋之役、先登破陣、遷爲車騎大將軍



儀同三司、五年沙苑之功、加封合前二千戶、俄授敷州刺史、加散騎常侍、外深推轂、內侍集書、十五年授右衛將軍、十六年授大將軍、後魏元年重授敷州刺史、公以先經刺舉、固辭不就、三年改封武陽郡開國公、除尚書僕射、職惟贊奏、任居封掌、分左右之儔、兼典舉之選、屬以江南阻兵、渚宮邊敵、軍機警急、鋒鏑縱橫、公奉命星言、元戎啓路、愬秦人之銳士、兼荆戶之廣卒、水龍競雙刀之勢、步騎陳四分之威、夷陵旣燒、黔



中方定。旋軍反旆。解甲休兵。其後鳳州內判成  
都外絕。公又總督衆軍。蒐乘卽道。兵不血刃。竝  
皆擒獲。遷其酋豪。納其降附。皇朝受終。文祖革  
命。神宗選賢與能。改絃創制。爰降冊書。授公柱  
國。增邑四千戶。二年。授同州刺史。衿帶關輔。唇  
齒秦晉。編戶殷積。邸閤儲峙。藩籬是任。親賢勿  
居。公建旗作牧。褰帷行部。六條斯舉。百城咸勸。  
三年。授公大司寇。又以公勲庸。特著冊封。楚國  
公。食邑一萬戶。蓋因破侯方仁等於荆陝。卽其



地而封焉。逖糾王慝，弛張刑政，式遏寇虐。於是御之以寬猛，柔遠能邇。然後平之以冲和，舜任咎陶，不仁者遠。晉舉隨會，羣盜皆奔。保定四年，授岐州諸軍事、岐州刺史。沉湎彌留，保定五年三月四日薨于私第。春秋六十有二，詔贈太保。同儕等十州諸軍事、同州刺史，謚昭公，禮也。十月庚申，塋于洪瀆之川，馳繚毀宗。客車專道，立甲被屬國之兵。介士陳輕車之騎，克善令終生。榮死，感嗚呼哀哉。公經德秉哲，體道居貞，履貴



思冲居盈念損澄波千頃不能變其清濁高牆  
百仞無以測其汗隆立身行已居安如陞亡躬  
殉義視嶮若夷至于將畧應變出奇設伏太乙  
風角之占常從星辰之候樓船戰陣之錄强弩  
馳射之書莫不動會機神發符雷電梯衝所向  
地靡百樓之城長戰所臨野關三門之陣是以  
斬將搴旗四十三戰尊官厚祿三十七年武彰  
七德之義誦誦九公之業迹紀庸器之文行昭  
易名之典昔臧文既歿穆叔稱其立言鄭僑云



亡。宣尼泣其遺愛。德陽青石之墓。千年未平。板  
江白虎之碑。百代無毀。敢因斯義。乃作銘曰  
遼水之東。冀州之北。旣曰都尉。兼稱屬國。歛氣  
餘勇。雄邊遺則。孝實天經。忠爲令德。冠冕世祿。  
羽儀祚胤。俗被燕丹。風慚英藺。劬勞役行。辛苦  
行陣。勇過溺駿。氣踰瓦震。王國克生。思皇多士。  
溫溫恭人。謙謙君子。擁旄仗節。出蕃入仕。  
五朝建旟。千里時逢。改特名載。策勲淮陰。召拜  
昭陽。破軍職司。刑政獄慎。深文沈羊。不飲萑盜。



無聞巴庸薄伐江漢專征軍總六校兵兼  
運長擊短後實先聲增壘威敵滅竈潛兵鐘鳴  
夜漏晞露朝陽邑里蕭索宅帷荒涼豐碑下柩  
題湊遷喪宮臨樛里臺傾孟嘗卜兆戒期遠辰  
告筮德遺身後名昭歿世館舍長捐泉扃永閉  
晏嬰悼齊柳莊悲衛風秋北原日沒川逝塋田  
舊頃客土新封淚墮片石劒挂孤松清徽令範  
千載餘蹤







傳

周使持節大將軍廣化郡開國公邱乃敦

崇傳

崇恒州代郡鼓城縣廣義鄉孝讓里人也昔壽  
邱建國賜姓者十二人平陽舉賢登朝者十六  
族況復大電繞樞流星入昴派分源別幹其嗣  
興者乎魏道武皇帝以命世雄圖飲馬河洛兄  
弟十人分爲十姓辨風吹律邱氏卽其一焉五  
代祖邈驃騎大將軍開府儀同三司營邱郡開



國公于豈天道西北既稟謀謨馬首東南實資  
匡贊因以封名仍爲賜氏與夫南公伯卽有連  
類宗則樂正非無準則曾祖雙軌使持節驃騎  
大將軍司徒青兗二州刺史范陽文昭公洛食  
之始上馬治國登庸之初昇槐論道生則絕席  
武宮死則配祠清室友人太原王氏三世爲將  
四代爲公社稷大宗鐘鼎貴族伉儷是歸秦晉  
足也祖提使持節衛將軍駙馬都督河交二州  
刺史靈壽縣開國公公子公孫聲名籍甚增輝



增耀弱冠昇朝。夫人清廉郡長公主孝文帝之  
第二女也。王姬有行。車服不繁。故得衛青上將。  
張耳賢夫。父願使持節大都督徐州諸軍事。徐  
州刺史平陽縣開國公。食邑四千戶。少年習象  
多見兵書。澆沙聚石之營。却日橫雲之陣。彎弧  
則戟破小支。抽劒則泉飛枯井。夫人宇文氏周  
文皇帝之第三妹也。母儀令範。女師賢哲。德高  
隆慮。義重河陽。魏受其終。周新其命。式墓封墳。  
追旌盛德。乃贈使持節大將軍廣化郡開國公。



食邑一千戶。夫人贈安德郡長公主遊魂冤結。非無廣漢之城。久客思歸。唯有東平之樹。自永安以來。魏室大壞。海水羣飛。天星亂動。禮樂征伐。不出於人主。舉賢誅暴。議在於強臣。高丞相驅率風雲。奄荒齊晉。我舅氏文皇帝。駕馭龍虎。據有周秦。南北渝盟。東西敵怨。既而各受圖書。竝當珪璧。百姓則父南子北。兄弟東弟西。事主則憂親。求生則慮禍。大周親戚。徧鍾茶炭。輸之城旦。下之織室。關河嚴隔。三十餘年。天厭喪亂。人



思反德彼之風塵旣靜函谷此之冠蓋屢涉漳  
濱中山冤枉之餘代郡凋殘之澤竝遇革音咸  
蒙禮送崇賓兄弟二人相看氣息親愛凋零方  
寸久亂恒山殺翮豈望同飛而安國徒中鬱爲  
卿相班超絕域遂得生還天和四年至于新邑  
朝廷以舅甥之國外內之親乃授賓使持節驃  
騎大將軍開府儀同三司大都督安樂縣開國  
公食邑一千戶賓得免虎口仍上龍門聲價已  
高風焱卽遠方欲討論國耻申雪家冤橫尸原



野是所甘心。肯不我與。先從朝露。春秋若干。衛國興文子之慟。長安有詔葬之悲。乃贈本官加少傅蒲虞勲三州諸軍事蒲州刺史。以天和六年某月日葬于長安之洪瀆原。妻青州石氏長城郡君。胤子孤勞。生妻嫠室。卽能有節。還成守義崇。蒙授使持節大都督驃騎大將軍開府儀同三司廣化縣開國公食邑一千戶。昆季二人同年上將。彤廷交映。檠戟相臨。昔二馮同德。繼踵當官。兩杜齊名。夾河爲郡。比斯榮寵。彼將慙。



色。俄然賓疾。奄捐館舍。崇兄弟勝衣。備罹禍酷。同氣長養。得及全人。今者來歸。更遭凶閔。每一悲慟。行路傷心。撫養愛子。情深馬援之慈。恭事寡嫂。義甚顏含之孝。天和六年。授大將軍餘如故。龍庭賞出塞之功。玉門勞旋師之寵。異代同和。見之今日。建德二年。授使持節都督宜州諸軍。事宜州刺史。忽忽橫閣。但有誦書。曖曖重帷。惟聞善政。清不置水。明非舉燭。乃是入境移風。非直停車待雨。有勅大將軍宜州刺史廣化郡。



公崇自夏季無雨。以迄于今。雖靡神不禱。仍未  
降感。知彼州內。獨蒙滂澤。諒由大將軍精誠所  
至。憂念郡人。豐稔可希。良以爲慰。又勅廣化公  
崇。知此存心政術。治勤黎人。受委稱職。嘉尚無  
已。古人有言。非行之難。念加勉勗。以致盡善。指  
令宜納。抑操賜齊。陳物如別。宜諭朕懷。昔陽平  
太守。別降紅粟之恩。荊州刺史。偏蒙袞衣之賜。  
治績允異。此之謂乎。崇清淨爲政。廉明爲法。人  
不忍背。吏不忍欺。性不飲酒。無所嗜欲。深沉牆



仍喜愠不形文必正詞絃惟雅曲仁義禮節是  
所用心緹袂紉素愛翫無已當令四郊多壘尚  
有公卿之辱鼓輦不息猶勞將帥之謀語其讐  
耻唯願橫行死地思其報國不佞身膏原野但  
令天假之年時綏之福忠貞之事公其取焉畧  
書梗槩陳之直史







墓誌銘

周大將軍聞喜公柳霞墓誌銘

君諱霞字子昇。河東解縣人也。秦始征晉之地。漢開平越之鄉。律中夷則。星居鶉首。况復莊謀於衛。既爲社稷之臣。喜對于齊。無廢諸侯之職。祖叔珍。宋員外散騎常侍。義陽內史。有徐邈之應對。居于散騎之省。有汲黯之正直。理于淮陽之郡。父季遠。臨川王諮議叅軍。宜都太守。蘭臺石室。是所洽聞。白馬飛狐。逾高詞氣。西都吳融。



擅名江表。言談相會。宛如舊焉。君膺令德之靈。  
稟冲和之氣。齟齬髻髮。夙智早成。愛敬自天。虔  
恭得性。含仁抱義。履信居貞。世父儀同忠惠公。  
特加罷異。乃謂公曰。吾昔逮事伯父太尉公。見  
語云。我昨夢汝登一高樓。樓盡峻麗。吾以坐席。  
乞汝。汝或富貴。恨吾不及見耳。吾向聊復晝寢。  
又夢將昔時坐席。還復賜汝。汝官位當復見及。  
王祥佩刀。世爲卿族。鮑永驄馬。家傳司隸。以此  
連類。差無慙德。輕車西昌侯。作藩襄漢君。昔年



十二以民禮修謁進止端詳神情雅正侯目送  
之不輟試遣左右踐君衣裾欲視舉動君徐步  
稍前曾無顧盼魏侯之見劉廙不覺歛容漢主  
之觀田鳳遂令題柱比之今日曾何足云驃騎  
廬陵王帝子出藩懸衡高選以君華望召爲主  
簿張坦直諫旣稱苟令之香鄒湛知言彌見羊  
公之德諮議府君于都薨背君奔赴六日卽屆  
京師形骸毀瘁不復可識靈柩泝江中川薄晚  
亂流乘選迴風反帆舟中之人相視失色抱棺



號慟誓不求生。俄爾之間。風波卽靜。咸以君精誠所致。成都孝子。自赴江流。貴陽先賢。身彰野火。並存靈應。咸可傷嗟。太夫人乳間發瘡。醫云。惟得人吮。癰血或望可差。君方寸已亂。應聲卽吮。旬日之間。遂得痊復。君于事親。可謂至矣。從兄右衛擁旌嶺表。苦相携致。昔馬遊志氣。爲馬援所知。班嗣才學。爲班彪見賞。復聞於今日矣。乃除永化縣令。靜尋歆案。或吟長岑之遠。乍撫鳴琴。不以河陽爲陋。曰。南金柱。合浦珠泉。曾莫



經懷未嘗留目解巾平西邵陵王法曹叅軍仍  
轉外兵除尚書工部郎始入禮闈既登蘭閣尚  
書僕射陳郡謝舉人望國華引君言論謂同坐  
曰江漢英靈見於此矣西中郎岳陽王以綠車  
之重臨西河之牧援用君爲本州治中尋遷別  
駕王叔理以品物流名陳仲舉以題軒馳譽君  
之展驥兼而有之及乎大盜移國王室騷然月  
動星搖雲平虹直岳陽王承制陝左當壁漢南  
天綱所頓英賢畢集授君吏部員外郎散騎常



侍兼太子侍讀，監儲甲觀。事重史丹，侍講桂宮。  
名高張禹，俄遷車騎大將軍、大都督，賜爵聞喜。  
縣公侍中，開府儀同三司，餘如故。方之驂乘，霍  
去病爲侍中。譬彼將兵，公孫敖爲驃騎，足以照  
曜六府，謨明九德。豈直允諧上將，匡贊中軍而  
已哉？旣而言從梁國，服政酆都。管仲有詞，卽受  
下卿之禮。臧孫見德，還奉嘉賓之宴。有詔授使  
持節、驃騎大將軍，開府儀同三司，霍州諸軍事。  
霍州刺史，犀節去關。袞衣馳傳，迎郊則文學前。



驅賓衛則邦君負弩。直以五溪遼遠。馬伏波之  
思歸。三湘卑濕。賈長沙之不願。是以宜城刺史。  
直會鹿門。白沙故地。仍留龍種。天厲弗戒。奄然  
終極。太和某年。歸窆于襄陽白沙之舊塋。君罷  
宇詳正。風鑒弘敏。澡身浴德。游藝依仁。汝南令  
望。扶風長者。不言財利。王夷甫之爲德。不談人  
物。阮嗣宗之爲人。從容亂離之機。保此令名。舒  
卷風雲之際。無妨貴仕。張衡渾儀之後。卽賦歸  
田。杜預沉碑已來。遂停鄉里。王仲宣有讀書之

樓。諸葛亮有彈琴之宅。實欲因此謝病。閑居終  
焉。鳴琴在膝。或對故人。寶劍自隨。肯遇稚子。百  
年俄頃。嗚呼哀哉。遂使君子之陵。止埋銅劍。賢  
臣之墓。唯銘石函。銘曰。

有莊有惠。居魯居衛。義是隨時。才堪濟世。北  
部尚書。東京司隸。必復其始。侯君相繼。華蓋一  
岳。文昌一星。青衿辨志。童子離經。義勗非馬。書  
勤映螢。往年靈樞。漂泊江沱。以君哀慟。川后停  
波。揚名北海。馳譽西河。誰登九折。不入朝歌。蔚  
炳



胥變攀陪遂遠白鹿隨軒丹暈附冕位叅上將  
榮兼本選蛇盤綬結龜迴印轉來朝平樂歸政  
咸陽蕃維卽啓軍幕仍張起茲禮數峻此戎章  
長離宛宛刷羽陵江世急奔流年催驚集滅沒  
頓轡扶桑搖軫智士石折賢人星殞西鄂芝枯  
南陽菊盡愴焉啟手生榮終極相杵輟春鳴機  
罷織熒熒屑子視陰餘息霜露履之哀哉欒棘  
龍巢壯望鳳闕前觀松長風遠地厚泉寒書埋  
簡落琴覆絃寬贈行之冊書而納棺

周大將軍襄城公鄭偉墓誌銘

公諱偉字子直滎陽開封人也周宣母弟就封于鄭河洛之地卽有民人號鄆之君非無郡邑其後蛇鬪于門鼃嘗于鼎韓侵負黍晉滅陽城其祀忽諸以國爲氏祖徹撫軍贈濟州刺史父先護驃騎大將軍儀同三司襄城郡公青州刺史永安中洛城晝掩黃河凌合翟泉會盟之地蒼鳥忽飛武庫兵欄之中鱗魚遂上三帥北緘五馬南浮梁武帝大造中原樹君伊洛公憑軾



棧車言歸舊壤起爲通直散騎侍郎天厭魏德  
政在強臣公耻入亂階乃于陳留起義太祖封  
函谷而待諸侯坐鄴宮而朝羣后威懷是接席  
卷西飛大統三年入朝蒙授武陽縣開國伯食  
邑六百戶尋除龍驤將軍北徐州刺史開河橋  
之陳解玉璧之圍張旃於富平被練于伊闕探  
虎穴而揮戈上魚門而懸胄故已策名司勲功  
高舍爵魏將侯景狼顧荆河天子命我偏師赴  
援垂餌虎口中途背盟事獲交綏公之力也除



中軍將軍散騎常侍大都督襲襄城郡公食邑  
二千戶仍除使持節車騎大將軍儀同三司餘  
如故遷驃騎大將軍開府加侍郎常伯位重霍  
去病之登朝上將官尊公孫敖之出塞以今方  
昔異代同榮魏後二年授大將軍江陵防主都  
督十五州諸軍事吳兵教士鱸舳習流島嶼憑  
陵波瀾衝激公躋臨江界已悉南越之兵裁泛  
樓船卽善昆彌之戰遂得安歌澧浦弭節潯陽  
留魯侯而宴章臺對齊人而畋雲夢周保定元



年授使持節都督宜州諸軍事宜州刺史天和  
六年授都督華州諸軍事華州刺史餘如故嶠  
函重嶂汧渭分流陽陵之溢旣奔華陰之學還  
聚而消渴連年屢有相如之患至于大漸遂如  
范增之疾桐君對藥分闕神明李柱侍醫更無  
方便以天和六年四月十七日薨年五十七詔  
贈本官加少傅都督司豫洛相冀五州諸軍事  
司州刺史謚曰肅公禮也天子輟朝彌深大臣  
之議羣公會葬咸得同盟之禮夫人李氏頓邱

貴姓卿相之門，賢才之室。霜露先侵，策封郊次。以其年十一月六日，合塋于咸陽之長安縣某原。合塋非古，既異三王之前。死則同穴，還同六載之始。雖復銜珠兩鶴，同歸紫蓋之松。出匣雙龍，共沒延平之水。嗚呼哀哉，乃薦銘曰：

國有巖邑，朝多君子。武公莊公，平王卿士。溫麥渝盟，祊田廢祀。駟乘停輿，來朝識履。惟祖惟考，既侯既公。樞機周密，出納清通。治繁政簡，處亂心雄。濟河遺惠，海岱餘封。世濟其美，載誕其罷。



也無不爲孝則不匱幽冀紛梗關河鼎沸自北  
自南聲聞梁魏揚旌汝穎威震三川擁旄江漢  
席捲樓船成臯塵起廣武烽燃麋興鹿箭鴈落  
驚弦總衛蘭綺申威河外山類鼓樓樹如車蓋  
都尉兩道將軍獨拜梧桐茂苑楊柳倡家千金  
回雪百日流霞周零倏忽悽愴榮華河陽古樹  
金谷殘花隴昏雲暝山深路晚風氣纔高松聲  
卽遠疇昔親友懽愉交結不爲平生應爲此別  
周大將軍琅琊定公司馬裔墓誌銘

公諱裔字遵脢河內溫人也南正司天北正司地是謂羲和之官卽嗣重黎之政邛之歸楚與章邯而竝封豫之避秦共毛公而俱去祖金龍仍居選部水鏡三臺父悅再牧荆河威風千里而身遭禍機遂爲季布所哭獲存遺嗣實賴程嬰之忠國家追念功臣更撫叔敖之子言思官族還求女齊之脢公始應辟爲河內功曹除員外郎常侍汲郡治兵黃河浮馬推鋒軹關之捷逐北長城之陳授平東將軍北徐州刺史柳泉



風塵三城席卷。棠陰鋒鏑。千室入關。遷車騎大將軍儀同三司開國龍門縣伯。仍除巴州刺史。雖復巴水三迴。夷歌數曲。徒逢白竹之弩。已濟青衣之功。朝廷以漢之功臣。須開上將之府。晉之代胄。宜紹瑯琊之國。遷驃騎大將軍開府。改封瑯琊公。食邑一千五百戶。宮闈近密。寔俟忠貞。詔爲大御伯。仍除大御正。職司常伯。任總夔龍。王道旣平。絲言惟允。尋除始州刺史都督。始州諸軍事。蠻夷恃險。狼顧鴟張。高山尋雲。深谷

無景九地縱橫三門起伏峰危馬東水險橋飛  
遂得谷靜山空冰消霧散仍爲信州刺史都督  
信州諸軍事精兵守于白帝足懼巴州之城船  
梯下於荊州彌動西陵之戍卽授使持節大將  
軍都督西甯州諸軍事西甯州刺史將啓北戶  
之人向通雲南之國聞寵若驚奄從深夜天和  
六年正月十八日亡春秋六十五詔贈本官加  
懷邵汾晉四州刺史謚定公禮也以建德元年  
七月十三日葬于武功郡之三疇原公愛敬純



深有隱無犯，忠貞亮直，知無不爲。在戎四十二年，身經六十九戰，至於多寵，唱籌並得，成功飛沙，擁石未嘗乖律。恂恂教義，吳起西河之風。閑閑鼓旗，李牧長平之政。身死之日，家無餘財。山木所資，一由詔葬。有始有卒，生榮死哀。銘曰：祝融是命，重黎克舉。公族乃建，天官卽序。避世于秦，承家于楚。金行失馭，玉鏡淪輝。我之烈祖，識變乘機。黃旗東沒，青蓋西飛。落星置道，長州出圍。及我皇父，荆河再撫。世屬喪亂，身沒猾豎。



嗟我遺嗣，崎嶇趙武。寒覆鳥翼，饑吞獸乳。獲歸河內，更襲瑯琊。年方小馬，怨結長蛇。藏兵九地，置劒千家。雪山埋馬，冰河陷車。旣乃班政，超然榮守。朱鷺頻飛，金龜轉紐。築塞長榆，營軍高柳。玉案推食，河橋勸酒。石門冰釋，金堤電散。蘆水門開，茅津成觀。馭風逸翮，修途始半。建武功臣，先悲吳漢。沉寥搖落，游揚浸微。金城路斷，郿塢人稀。風松雲蓋，白水山衣。賢已星殞，人沒蘭蓑。

周大將軍上開府廣饒公鄭常墓誌銘



公諱常字子元。滎陽人也。周宣王之弟。初封其國。鄭穆公之孫。始成其姓。祖思慶。建威將軍。山陽太守。考頊。儀同三司。豫州刺史。南陽坐嘯。值此邦君。西河建隼。逢斯刺舉。公侯繼踵。冠冕連鑣。可得而言。傳於史籍。公髫齡知禮。早年馳譽。就經。黌舍畧見書堂。習武。兵欄偏知劒術。雖復年猶小學。已爲儒者所稱。位在偏裨。卽入將軍之賞。大統三年。起義華陽。授永安縣開國男。文皇帝霸迹初基。英雄輻輳。公拔劒轅門。賴川從

我洛城逆戰壯於白馬之兵。河橋解圍勇于烏  
林之策。授平東將軍。帥都督襲父封。魏後三年  
授持節車騎大將軍。儀同三司。車騎用郭淮之  
勲。儀同取王沉之貴。公之此授。僉曰得人。進爵

廣饒縣公。邑千戶。保定三年。授使持節都督遷

州諸軍事。遷州。

神道碑作羅州刺史。今墓誌作遷州。按隋地理志西魏嘗于竹

川縣置羅州。宇文後周于房陵郡置遷州。至隋并號房州。刺史。卽總領金州

兵馬。開招北戎高山。尋雲深谷。無景梯繩。乃上

浮竹。裁通。閩越影嚮。勾吳聲勢。公出戰短兵。並



皆奔北瓦解冰碎山空谷靜授持節開府儀同  
大將軍柏梁高宴有大將軍之詩幕府初開有  
平陵侯之國比之今日豈可同年而語哉自是  
使車被之繡服風謠是察刑政是觀公露節東  
驅風奔羣盜埋輪當路威振中原武皇帝有盟  
津之師以公爲中權之勁外從決勝內侍軍謀  
及文軌旣同旃旌已偃司勲行賞軍吏舉功乃  
授使持節上開府增邑五百戶賜姓宇文與國  
同乘之榮周之宗盟非復異姓之後蕃屏是寄

隆寵所歸。公室無疎。此之謂矣。九州都督。須得其才。千里諸侯。實俟其政。乃爲使持節都督東徐州諸軍事。徐州刺史。尋遷南兖州諸軍事。南兖州刺史。公頻總六條。再勞十部。俗變風移。人懷吏畏。滯穗遺秉。有利疲人。山桑野蠶。足充貢賦。化被殊俗。威行隣境。奏事京師。四方第一。謂真刺史。其在斯乎。春秋未高。奄然邁疾。以大象元年薨于州鎮。時年六十三。嗚呼哀哉。吏人扳慕。飛走變色。河濟輟舂。淮沂罷市。以今年歸葬。



於滎陽之山，詔贈某官禮也。嗟陵谷之貿遷，懼  
徽猷之永遠，地久天長，敢鐫貞石，銘曰：

荆河惟豫，洛食之本。水達滎波，山斜陸渾。德星  
猶照，祥風未遠。代不乏賢，文無闕袞。公之生也，  
實降英靈。忠爲德本，孝稟天經。觀書虎館，學劍  
龍亭。雕弓偃月，行馬流星。置陣黎陽，麾兵官渡。  
平陰聽鳥，馬陵書樹。氣視迴津，星占飛步。火斷  
羗營，沙崩賊路。及驅犀節，乃牧雄州。吏不驚犬，  
人無喘牛。西蠶得歲，東作逢秋。草爛獄戶，星低

市樓五將星亡三台岳拆哀哉天道遂常明哲  
棟梁崩壞風雲寂滅北郭長悲東都永別幽深  
此地宅兆斯憑山迴虎圈路上魚陵悲風夜烈  
苦露晨凝蘭芬菊茂終古相承

周大將軍義興公蕭太墓誌銘

昔司徒之敷五教當堯讓之初丞相之總萬機  
值秦亡之後若殷人受氏乃承微子之封梁運  
應圖實啟延陵之國公諱太字世怡蘭陵人也  
太祖文皇帝之孫鄱陽忠烈王之子派別天皇



支分若木直幹自高澄源已遠茂親明德是稱  
毛畢之功宗子維城乃建邢茅之國大同元年  
年十六封豐城縣開國侯食邑五百戶山臨鶴  
塞非無陶侃之賓氣連牛斗卽有張華之劍解  
褐給事中仍太子洗馬公子出身非郎官而同  
品中朝洗馬異式道而前驅以公居之誠爲高  
選大同元年入直殿省其年轉太子中書舍人  
南宮宿衛職司蘭綺北閣從班榮叅顧問通籍  
兩宮得賢斯在大同三年授持節仁威將軍譙

州刺史。褰帷祥氣之境。刺舉消憂之地。南陽風俗。文學更多。美稷相迎。童兒逾遠。旣而亂離瘼矣。王室騷然。大夫有行役之悲。君子有無期之怨。背關懷楚。扁舟而行。江漢奉當璧之君。華夏歸中興之主。承聖元年。拜侍中。無雙對問。實踵武干丁鴻。多識舊章。足齊衡於王粲。二年。除持節平西將軍。臨川內史。仍轉平南將軍。桂陽內史。尚方鑄劍。再轉金龜。御史分符。雙封銅虎。豈直鄧攸清白。見稱五鼓之歌。劉寵廉能。名爲一



錢之郡。遂以天保未定。王途多梗。還吳不可。歸  
蜀無路。臨淄負海。翻然改途。竄身清漳。垂翅渤  
海。蒙授車騎大將軍散騎常侍。仍爲持節都督  
永州刺史。而秦亭壓境。邾析聞城。鼓角地鳴。將  
軍天落。雖復瓶缶聽聲。無防于地道。冠繩柴結。  
不却于雲梯。請命受降。翻歸都護。周朝以楚林  
晉用。不停於平章。趙璧秦求。無論於霸遠。以保  
定五年。除使持節驃騎大將軍開府儀同三司  
義興郡開國公。食邑一千三百戶。天和二年。授

使持節都督蔡州諸軍事蔡州刺史楚項襄之  
愛子既布衣而戍谷魏安釐之母弟亦羈旅於  
邯鄲憂既傷人降年不永春秋五十有一薨於

蔡州之鎮送故入關空餘袞服歸軒在道還更  
垂帷嗚呼哀哉有詔贈官謚某禮也五年十一  
月葬於長安北原樛里子之墳正臨武庫太史  
公之墓直對臯門銘曰

立鳥遠烈相士弘謨東封宋社西歛秦圖人承  
佐漢國紹開吳有美令德茂親藩邸建國皇支



承家帝弟，率由冥會。亮直天啓，轅回聞詩。唐都  
習禮，博望之苑。金華之宮，文林講德。武帳叅戎，  
名書柱上。策滿帷中。託身淄右，蒞政淮東。秦降  
西逼，楚澤南窮。豈驚獵火，或懼秋風。屬期遠畧，  
逢茲應變。陣橫十里，兵圍一面。月暈孤城，塵驚  
虛援。春筍非糧，秋蒿無箭。垂翅卧龍，夷衿輟戰。  
豈值懷來，恩加始賞。王爵愈峻，戎章更上。朱鷺  
不飛，虞歌卽響。泣子畱恨，藏書長往。炎涼迭運，  
零落山邱。霜芬幕月，松氣陵秋。嗟南國之王子，

成東陵之故侯

周大將軍懷德公吳明徹墓誌銘

公諱明徹字通昭。兗州秦郡人也。西都列國。長沙王功被山河。東京貴臣。大司空名高霄漢。豈直西河有守。智足抗秦。建平有城。威能動晉而已也。祖尚南譙太守。父樹右軍將軍。抗拒淮沂。平夷濟潒。代爲名將。見于斯矣。公志氣縱橫。風情倜儻。圯橋取履。早見兵書。竹林逢叅。偏知劍術。故得勇爵登朝。材官入選。起家東宮司直。後



除左軍葛瞻始嗣兵戈。仍遭蜀滅。陸機纔論功業。卽值吳亡。公之仕梁。未爲達也。自梁受終齊卿得政。禮樂征伐咸歸舜後。是以威加四海。德教諸侯。蕭索煙雲。光華日月。公以明略佐昔。雄圖贊務。鱗翼更張。風颺遂遠。冠軍侯之用兵。未必師古。武安君之養士。能得人心。擬于其倫。公之謂矣。爲左衛將軍。尋遷鎮軍。丹陽尹。北軍中候。總政六師。河南京尹。冠冕百郡。文武是寄。公無愧焉。瀟湘之役。憑陵島嶼。風船火艦。周瑜有

赤壁之兵。蓋舳艫。魏齊有橫江之戰。仍爲平

南將軍開府儀同三司都督湘衡桂武四州刺

史。遂得左廣迴局。麟車反暢。長沙楚鐵更入兵。

欄洞浦藏犀。還輸甲庫。雖復戎歌屢凱。軍幕猶

張。淮南望廷尉之囚。合肥稱將軍之寇。莫不失

穴驚巢。沉水陷火。爲使持節侍中司空車騎大

將軍都督南北兗青譙五州諸軍事南兗州刺

史南平郡開國公食邑八千戶鼓吹一部中台

在玄武之宮。上將列文昌之宿。高蟬臨鬢。吟鷺



陪軒平陽之邑萬家。臨菑之馬千駟。坐則玉案  
推食。行則中分。麾下生平若此。功業是焉。旣而  
金精氣壯。師出有名。石鼓聲高。兵交可遠。故得  
鱸舫所臨。蓋于淮泗。旌旗所襲。奄有龜蒙。魏將  
已奔。猶書馬陵之樹。齊師其遁。空望平陰之烏  
俄而南仲出車。方叔蒞止。暢轂文茵。鈎膺倬革  
遂以天道在北。南風不競。昔者裨將失律。衛將  
軍於是待罪。中軍爭濟。荀桓子于焉受戮。心之  
憂矣。胡以事君。宣政元年。屈于東都之亭。有詔

釋其鸞鑣。蠲其疊社。始弘就館之禮。卽受登壇之策。拜持節大將軍懷德郡開國公。邑二千戶。歸平津之館。肯聞櫜馬之嘶。舍廣城之傳。裁見諸侯之客。廉頗眷戀甯聞更用之期。李廣盤桓無復前驅之望。霸陵醉尉。侵辱可知。東陵故侯。生平已矣。犬象二年七月二十八日。氣疾增暴。奄然賓館。春秋七十七。卽以其年八月十九日。寄瘞于京兆萬年縣之東郊。詔贈某官謚某禮也。江東八千子弟。從項籍而不歸。海島五百軍。



人爲田橫而俱死焉。嗚呼哀哉！毛修之埋于塞表，流落不存。陸平原敗於河橋，死生慙恨。反公孫之柩，方且未期。歸連尹之尸，竟知何日。遊魂羈旅，足傷溫序之心。玄夜思歸，終有蘇韶之夢。遂使廣平之里，永滯冤冤。汝南之亭，長聞夜哭。嗚呼哀哉！乃爲銘曰：

九河宅土，三江貢職。彼美中邦，君之封殖。負才矜智，乘危恃力。浮磬戢鱗，孤相垂翼。五兵早竭，一鼓前衰。移營減竈，空幕禽飛。羊皮詎贖，畫馬

何追荀瑩永去，隨會無歸，存沒俄頃，光陰悽愴。  
岳裂中台，星空上將，眷言妻子，悠然亭障，魂或  
可招，喪何可望，壯志沉淪，雄圖埋沒，西隴足抵，  
黃塵碎骨，何處池臺，誰家風月，墳塋霸遠，營魂  
流寓，霸岸無封，平林不樹，壯士之隴，將軍之墓，  
何代何年，還成武庫。

周大將軍幽國公趙廣墓誌銘

公諱廣，字乾歸，邵惠公之元孫，幽孝公之長子，  
若水拂日，長蛇委天，龍圖幕河之光，神鼎連雲。



之氣六辯構字五運徵祥是以維嶽降神自天生德凝脂點漆日角珠庭爲子則名高五都爲臣則光照千里華蓋中天之峰未階其峻虞淵浴日之水不盡其源歲在珣車年方竹馬月中桂樹切問能訓石上水生懸思卽悟年十一孝公薨熒熒在疚孺慕過禮泉驚孝水竹動寒林三行克宜八翼斯舉大周建國宗子維城設壇封人分司典命開國天水郡公食邑二千戶元年授使持節驃騎大將軍開府儀同三司其年

四月授都督秦州刺史。孝公久牧汧隴，遺愛在人。今茲見撫，我君之子，豈獨司隸之臺。鮑宣累葉丞相之府。韋賢重代。二年拜大將軍，方衛青之張幕。冊重元勲，譬韓信之登壇。榮高獨拜。武成元年，遷都督興梁等十九州諸軍事，梁州刺史。嶓冢導漾，乃濟漢之東流。蔡蒙旅平，實華陽之西極。其年九月，改封蔡國公，食邑萬戶，地接韓城，關隣楚鄣，戶封八縣。恩深寇恂之功。邑啓萬家。事極曹叅之賞。保定元年，授小司寇，犴戶



苦生。圖關籥動。載酒屬車。幸無冤氣。觀囚軍府。  
或聽鳴琴。二年轉守蒲城都督。潼關等六防諸  
軍事。其年閏月遷都督秦渭等十二州諸軍事。  
秦州刺史。公亟牧冀城。頻藩隴坻。豪桀斂手。貪  
殘解印。加以上谷精兵。漁陽噪鼓。北臨高柳。南  
望長倫。匈奴下馬之山。貴相藏酒之谷。莫不遠  
慕威聲。遙承風化。二年奉詔向甘州迎皇后。有  
文書手。仲子之歸。紀裂繻來。卿爲君逆。自非名  
高絕國。威被和隣。豈得稱族而行。尊君之命。四

年授柱國大將軍。昭陽以功高見用。項梁以名將當官。以今方之。彼有慙德。天和三年。授都督陝虞等八州。甘防諸軍事。陝州刺史。屈產垂棘。既有滅虢之兵。王官羈馬。非無絕秦之路。公以正正鼓旗。閑閑車軌。服叛威邊。算無遺策。但以中外久勞。積斯災疾。山川則並走羣望。賓客則諸侯在門。是以請謁承明。言歸湯沐。方詢夏郊之祀。或辯桑林之祟。更除秦州刺史。仍襲父爵。幽國公。分流之嶺未登。晚塞之城空望。太夫人



以公羸瘠悲泣相守。胃氣交衝。奄捐館舍。公頓  
伏。苦寢。水漿不入。雖王人勸奪。創鉅愈增。母死  
于子。子死于母。慈孝之道。一朝總集。大漸之辰。  
春秋二十有九。四關罷市。三軍行哭。言尋聽訟。  
猶見寒棠。還顧空營。惟餘衰柳。謚贈某官。禮也。  
六年六月。歸葬於秦州之某原。亥甲啓路。追軫  
騾騎之功。龍旂贈行。深悼東平之遠。公亮直惟  
忠。溫恭惟孝。居之仁義。飾以禮樂。風神機警。聰  
睿精明。有伋于宮牆。無形于喜愠。金版玉策之

記。枕籍忘疲。蘭葉芝花之圖。膏映必舉。碣石秋  
雲。昭陽落月。思風含臆。言泉流吻。翩翩書記。則  
阮瑀陳琳。荏荏風流。則王濛謝朓。語其百發。弓  
絕于猿吟。論其百中。劍深于鴈陣。枚乘之望。梁  
苑。不憚棄官。樂毅之求燕路。無辭千里。至如應  
變將畧。雷電立成。帷帳謀猷。孫吳闇合。有品藻  
人倫之志。有清平天下之心。鵬路忽摧。龍津遂  
壅。嗚呼哀哉。太宰早茂三荆。長辭萬始。撫養遺  
孤。連枝同氣。馬援之誠。兄子。義存謹飭。王沈之



事世叔情深愛敬同德比義此之謂乎乃爲銘  
曰

御乾從紀乘離作聖白環讓德玄珪受命平一  
地紐增輝天鏡傍廕數國前臨七政地屬先登  
昔逢下武玉璫撥亂金滕光輔衛晉承家邢茅  
胙土波分建木派流玄扈景命寅序徽猷淵塞  
忠有令圖孝爲全德山節蒞政桓珪守國瀚海  
將臨燕山行勒平樂高宴金華說經論儒璧水  
親禮明庭相風待賦承露須銘乘舟向日策馬

隨星德舉克明、能賢允淑、上將授賑、元戎推轂、  
趙失東漁、胡亡南牧、箭下遼城、泥封函谷、袞衣  
頻露、丹旌亟卷、約法情推、繁辭理遣、盜烏懸察、  
疑蛇立辯、人共官園、家同野蔞、籊雲推景、轉風  
落仞、星裂中台、山傾左鎮、夏楹舍爵、殷階啓殯、  
繆幕躡行、明旌庭引、秦川直望、隴水分飛、山河  
滿目、容衛靈歸、陵圖石馬、車晝袞衣、小山搖落、  
長林變衰、淒愴原隰、荒涼宅兆、樹密人稀、山多  
路小、十里松城、千年華表、夜臺尤寂、窮泉無曉、



周驃騎大將軍開府侯莫陳道生墓誌銘

君諱道生，字某，朔州武川人也。本系陰山，出自國族，降及于魏，在秦作劉，父少興，武川鎮將，山河抗拒，關塞被邊，早擅威聲，咸多雄烈。君讀書馬上，清談劒端，獨運六奇，專精三畧，雖復身居未將，而勇冠旌門，位在支軍，而謀叅幕府。魏正光五年，任統軍，隸天柱爾朱榮，征北海王。永安三年，隨太師賀拔勝入關，尋轉別將，滑源卷甲，關城東馬並皆克捷。君有力焉。永熙三年，補都

督太祖文皇帝奄有關河，令行天下，以君幹畧  
委之爪牙，名洽中涓，功叅上造，兵臨河曲，前登  
白馬之津，寇發蒲城，先戰黃沙之苑，臨晉橫船，  
旣擒趙將，馬陵削樹，復下齊兵，班瑞司勳，披圖  
疏爵，授驃騎大將軍，金紫光祿大夫，鄆縣開國  
公，食邑五百戶。趙儼之爲驃騎，正駕單車，張湛  
之拜光祿，長乘白馬，以斯連類，朝野榮之。大統  
九年，更姓侯莫陳氏，隨大將軍拓跋，遠經始陽，  
二水長關，三川無市，擐甲構病，死于轅門，春秋



五十一贈持節都督朔州刺史君在武川文皇帝同鄉里霸功旣立王業克成不忘捨講猶論價博今嗣德維新功臣追遠東都馬鳴不無見日之歎北陵車過終憶平生之言有詔更贈使持節驃騎大將軍開府儀同三司都督宜敷絳三州諸軍事敷州刺史謚某公禮也夫人拓跋氏安邑郡夫人庭有鐘鼓家承箴誡教容教德言告以歸天和五年六月薨卽以其年十月同葬于京兆某縣洪源鄉武子成寢請西階而合

葬平陽下嫁。卽廬山而共墳。銘曰

凝陰遠寂。廣漠平寒。沙窮瀚海。地盡皋蘭。塞鴻

秋去。胡桑夏乾。風土壯氣。山河凜然。師一作兵旅

上谷。威雄武川。君則繼踵。代不乏賢。匣有忠劍。

庭流孝泉。魏室多故。餘風未殄。天保護德。當途

廢典。上將指蹤。中涓力展。洛城夜捷。河梁朝剪。

鐵劍金龜。榮追玉鉉。身胄漢祚。門承魏緒。並擅

華宗。俱稱當路。伉儷云匹。年齡並故。趙瑟秦聲。

同爲邱墓。小陵石槨。洪原鄉墓。芻靈兩引。池柳



雙前隊路仍合松城卽連霜隨柳白月逐墳圓  
芝蘭幾代陵谷何年

周車騎大將軍贈小司空宇文顯和墓誌

銘

公諱顯和字某上黨武鄉人也自大霧浮河長  
虹映渚承源于若水纂系于蒼林上黨居韓之  
西常山在趙之北因地爲氏可畧而言焉祖求  
南衛將軍冀州刺史父金殿鎮遠將軍兗州刺  
史並控鶴兵俱張戎樂聲榮之盛繼踵當年公

稟山嶽之靈、擅風雲之氣、容止矜莊、聲名籍甚、  
彎弧挽強、左右馳射、故得名高上谷、威震樓煩、  
襲爵安吉縣侯、食邑五百戶、永興三年、幽并叛、  
換有無君之心、帝顧謂公曰、天下洶洶、將若之、  
何、公曰、擇善而從之、乃誦詩云、彼美人兮、西方  
之人兮、帝曰、是吾心也、乃定入關之策、以公母  
老家大、令預爲計、公曰、今日之事、忠孝不並、君  
不密則失臣、臣不密則失身、帝愴然改容曰、卿  
是我王陵、遷朱衣直閣、閣內大都督、改封長廣



縣公邑一千五百戶。武帝初至潼關，太祖親迎。漆水，太祖素知公名而未之識也。目于衆，疑而不問。直云：「令此人射水傍小鳥，應手卽着。」太祖喜云：「我知卿名矣。」卽用爲帳內都督。滄州諸軍事，滄州刺史，增邑并前二千五百戶。黃公衡之決事。魏后是以推心。潘承明之忠壯。吳王爲之降禮。異代同榮。見之今日。東夏邊隅，地連荒服，井陘塞道，飛狐路斷，乃以公爲使持節衛將軍都督東夏州諸軍事，東夏州刺史，白波青犢之

兵。銅馬金繩之亂。莫不交臂屈膝。牽羊抱馬。在  
州邁疾解。任還朝。小馬留廐。餘牀掛壁。吏人攀  
戀。刊石陘山。雖非漢陽之城。還似扶風之路。授  
使持節車騎大將軍儀同三司。加散騎常侍。以  
魏後元年疾甚。亡于同州。春秋五十七。天子輟  
樂。羣公會喪。太祖親臨弔祭。哀慟左右。于皆兵  
革交侵。普斷贈謚。卽以本官印綬權葬于同州  
之北山。今建德二年二月二十三日。遷葬于咸  
陽長安縣之洪瀆原。皆逢禮樂之遷代。屬謳歌



之變。國雖異政。人足追榮。乃贈使持節。驃騎大將軍。開府儀同三司。小司空。丹延綏三州諸軍事。延州刺史。謚某公。禮也。夫人高氏。渤海人也。柔叅晉政。拒曹爽之異謀。起在漢庭。共王陵而俱對。况乎箴訓有儀。言容以德。肅恭中興。賢才內則。豈直不聽雜樂。以變齊國之風。不食鮮禽。以斷荆王之獵。昔之合葬。季武子之西寢。今之同穴。長平侯之北陵。世子神舉。兄弟至性純孝。善居喪禮。有終有始。于身無改。是以宦成名立。

孝顯忠貞銘曰

北岳二名、葱河兩本、其峻惟極、其源惟遠、俗稟  
山川、人資台袞、義烈桓桓、才雄惓惓、乃祖乃父、  
繼踵威雄、擬金北陸、鳴玉南宮、隱若吳漢、賢哉  
竇融、負霜依德、無雷向風、挺此含章、生茲秉德、  
孝實天性、忠爲人則、暢轂鏤膺、燕南趙北、弱水  
將通、九部可勒、帷幄叅謀、宮闈典職、善擇忠言、  
能防變色、繁弱已勁、淇園乃直、戟中小支、禽穿  
左翼、建旛赤谷、揮戈武州、長城萬里、河水雙流、



潁川多恙，淮水未瘳。義重穿壁，恩深置郵。于谷之口，于渭之邱。陽山零落，碑闕低昂。草銜秋火，樹抱春霜。書劍俱沒，人琴並亡。哀哀嗣子，純心靡託。孝水未枯，悲松先落。室進巢鵲，門通弔鶴。功臣身殞，會圖麟閣。

周譙國公夫人步陸孤氏墓誌銘

夫人諱某，字某，本姓陸，吳郡人也。大夫拓境，百越來庭。丞相勒兵，三江席卷。高祖載爲劉義真長史，留鎮關中。旣沒赫連，因卽仕魏。臨終，誠其

子孫曰、樂操土風、不忘本也、言念爾祖、無違此心、祖政驃騎大將軍儀同三司恒州刺史父通柱國大將軍大司馬文安公匡贊經綸參謀揖讓名高廣武功重長平夫人七德含章四星連曜敬愛天情言容禮典九日登高作銘秋菊三元告始或誦春椒年十有四娉于譙國友其琴瑟愈恭節儉之心伐其條枚實秉憂勤之德鄴地登高之錦自濯江波平陽採桑之津躬勞蠶月天和元年冊拜譙國夫人東武亭之妻既稱



有秩。南城侯之婦。還聞受封。桂國殿下以名華。  
分照增城峻土。揚旌燹道。問政邛都。白狼之溪。  
途艱黃牛之坂。荔枝之山。地險蒲萄之國。夫人  
別離親戚。關河重阻。夷歌一曲。未足消憂。猿鳴  
三聲。沾衣無已。是以天厲之疾。遂成沈痼。玉瀝  
難開。金膏實遠。建德元年七月九日薨于成都  
私第。春秋二十有一。卽以其年十一月二十二  
日歸葬長安之北原。詔贈譙國夫人禮也。殿下  
傷神秋月。掩淚長松。周季直之留書。更深冥漠。

潘安仁之詞藻。徒增哀怨。豈直西河女子。獨見  
銀臺東海婦人。先逢金闕。銘曰

芟陵反旆。椒山止戈。金精據嶺。昌閣淩波。西遊  
卿相。東裂山河。華亭冠冕。穀水絃歌。震維徙族。  
燕垂從宦。塞入飛狐。關連鳴鴈。策預登臯。功叅  
臨澗。寶鼎留銘。彫戈餘贊。應圖淑令。秉禮言歸。  
魚軒馮軾。澤雉文衣。明月照鏡。仙石支機。行雲  
細起。迴雪輕飛。北降帝子。南麾蜀守。若水旣開。  
靈山已鏤。月峽猿啼。江神牛鬪。星機北轉。日轡



西迴陽泉伏氣陰律沉灰鶴辭吳市鳳去秦臺  
神光離合燈影徘徊雙流反葬百兩迴旌少女  
離位夫人去城帷堂野設帳殿郊營山川奇事  
風月無情搖落邱隴荒涼封域樹樹秋聲山山  
寒色草短逾平松長轉直節墳方固園陵永植  
周趙國公夫人紇豆陵氏墓誌銘

夫人諱含生本姓竇扶風平陵人魏其朝議列  
侯則莫能抗禮安豐奉圖功臣則咸推上席外  
戚列傳旣聞建武之書仲山古鼎或表單于之

獻祖略少保建昌郡公父熾柱國大將軍大宗  
伯鄧國公孟津大誓常預同德之臣咸陽違約  
克贊先登之主並得位入六府功參八柄夫人  
有文在手有象應圖榮曜夙彰徽華早茂肅恭  
以禮受教于公官言容以德有聞于師氏及乎  
進賢君子內主邯鄲琴瑟在堂輜駟是服長久  
于節不無秋菊之銘履端于始或有椒花之頌  
豈止莊姬掩笑楚相知慙定姜問兆齊兵不入  
武成二年冊拜趙國公夫人漢王聞立義之婦



邑以延鄉。齊侯見有禮之妻。封之石窀。異代同  
榮。差無慙德。柱國殿下。居若木之一枝。在天潢  
之別派。揚旌玉壘。驅傳銅陵。南通向日之民。東  
被無龍之國。夫人從政月峽。贊德雲門。錦濯江  
波。還臨織室。山明石鏡。卽對粧樓。旣而玉律頻  
移。金爐不變。胡香四雨。嗟西域之使稀。靈草一  
枝。恨瓊田之路絕。天和五年四月二十二日。薨  
于成都之錦城。春秋二十。孫子荆之傷逝。怨起  
秋風。潘安仁之悼亡。悲深長簫。况復仙臺永別。

無復簫聲。傳母長歸。唯留琴曲。七年二月日歸。  
塋於長安之洪瀆原。詔贈趙國夫人禮也。雲雨  
去來。旣留連于楚后。光陰離合。實惆悵于陳王。

銘曰

河西斗絕。觀津孤起。章武賢臣。安豐賢仕。木樓  
千仞。金山萬里。紹慶邢姨。基昌宋子。施衿趙北。  
侍姆秦南。絃綖禮數。綸狄駢驂。義超江汜。仁流  
葛覃。玉筐迎鷺。金籠助蠶。敬愛純深。端莊淑問。  
有光國史。無形喜愠。舉案外恭。停機下訓。馨馥



于蘭年華于舜風雨消散神靈離絕婺女還星  
姮娥歸月左楹夕奠高堂朝發空揚凌波更無  
迴雪下溼曰隰高平曰原西臨火井北望寒門  
猶垂雉服尚駕魚軒平原忽矣天道何言山迴  
地市路沒滕城松悲鶴去草亂螢生新雲別起  
舊月孤明賢墳永式節隴常貞

周安昌公夫人鄭氏墓誌銘

夫人諱某滎陽陽武人也周宣王之母弟俾侯  
于鄭鄭莊公之重世卿士于周以國爲族自茲

而始。祖瓊太常恭侯父穆司空貞公西京賦詩。  
奉常叅柏梁之宴。東都言議。司空爲武衛之官。  
籍連帝譜。旣同盤石。門稱通德。無廢儒林。夫人  
禮義閨門。端莊令淑。采采芣苢。萋萋葛覃。及乎  
作配君子。言事舅姑。下氣怡聲。承巾奉箒。親戚  
惟禮。閨闈以睦。保定二年。冊拜滎陽郡君。序戚  
升榮。從夫有秩。豈惟立義之婦。邑以延鄉有禮  
之妻。封之石窰。大將軍沉犀二江。夫人聞猿三  
峽。明月靈關之阻。秋風蜀道之難。掩以瑤華。先



從春露天和十八年五月二十日薨于成都春  
秋三十六詔贈安昌國夫人禮也卽以其年十  
一月十六日歸葬于咸陽之白起原遂使山迴  
反壤先封節婦之陵曰八虞淵實掩賢姬之墓  
嗚呼哀哉乃爲銘曰

天河開國分畿置政地有十城人居九命疇昔  
之邑今茲成姓識履傳風叅輿留慶三星在戶  
百兩言歸虔恭內政榮曜中闈承姑奉盥訓子  
停機桑園蠶績錦室鸞飛珎璜節步藻火文衣

巴水幽咽猿鳴斷絕月落珠傷春枯桂折趙琴  
長辭秦簫永別貞姬掩隧節女封墳洛濱無月  
荆臺失雲鳥悲傷聽松聲愴聞千年遂古百代  
餘芬

周大將軍隴東郡公侯莫陳君夫人竇氏  
墓誌銘

夫人諱某扶風平陵人也章武開國名高外戚  
之右安豐入朝位在功臣之上祖以孝昌之始  
主諾淮陽父以正光之初塞帷海岱夫人生于



禮義之門宗於箴誠之德虔恭惟禮令淑惟儀  
及乎百兩言歸三星在戶箴盟始事條枚是則  
有子從政猶無逸豫之心有夫出征自識山陵  
之兆大統十六年冊授永安郡君婦以夫尊親  
由子貴朝章家慶兼而有之保定二年改授隴  
國夫人車服禮數珪璫典則有美河魴足光彤  
史旣而風霜所及灰琯遂侵與善何言至于大  
漸天和六年四月七日薨春秋六十有六卽以  
其年十月十日遷葬于咸陽萬年縣之杜原山

形起伏既符白鶴之祥地勢風烟乃合青烏之  
氣銘曰

觀津世族平陵豪姓四侯登仕三君從政白狼  
建功丹蛇襲慶漢之廣矣先聞淑令君子朝端  
賢才家政簪珥以禮軒車以命讓果成廉推珠  
止競百年超忽千金莫恃室謝賢夫庭辭貴子  
歸輦輟露采繁廢祀室委眠蠶衣留畫雉雲垂  
下澤日掩高春空帷舊館虛幕新封山迴廣柳  
路沒深松游魂幾變夫人何從



周冠軍公夫人烏石蘭氏墓誌銘

夫人諱某，樂陵人也。晉司徒樂陵公苞後，子孫就封，因卽家焉。扶風舊城，猶存鐵市。河南故墅，尚餘金谷。或寓燕陲，仍仕代郡。祖行，代郡尹父。魏司空蘭陵郡公司空佐，命魏朝少傅丞。凝周室，並爲大族，俱蒙賜姓。秦晉匹也。是曰通家。夫人年十七，歸于宇文氏。淑令端莊，含章貞吉。箴監惟儀，閨闈已正。某年，除金鄉郡君。某年，改授冠軍夫人。四德小君，宜其家室。三事內主，翻辭

贊務以保定五年四月遘疾薨。昔年四十有四，卽以其年某月日歸葬于京兆之某原。人世風煙，山川超忽，陵波青麥，儻逢貞女之墳。隴首白楊，或表賢姬之墓。乃爲銘曰：

三星麗天，五岳鎮地。禮有其秩，人居其位。燕趙多奇，山川雄氣。挺茲令淑，惟此含章。玉生庭照，蘭開室香。邢姨褰服，宋子河魴。百兩言歸，九儀從聘。綸狄七彩，軒車六命。鼎室辭親，槐廷贊政。世爲閼水人，成大夢。迴帳山門，移燈泉洞。金棗



長含銀蠶永送香填栢柳路閉松城悲鸞獨影  
雄劍孤鳴留連趙琴悽愴秦笙

周太傅鄭國公夫人鄭氏墓誌銘

夫人諱某，滎陽開封縣遠里人也。七子賦詩足  
光賓客。三卿從政，實靜諸侯。驟乘則晉后停輿。  
來朝則漢君識履。華胄蟬聯，無虛史籍。祖邠秦  
州別駕，父茂伯撫軍將軍、涼州刺史、伯陽縣侯。  
夫人令淑，早聞芝蘭獨茂。旣容旣德，言告言歸。  
悌實溫清，恭惟箴誨。太傅弼諧周室，股肱攸寄。

夫人轉佐君子勤勞是司琴瑟既友條枚無伐  
故得用之邦國成之孝敬某年月日封鄭國夫  
人禴狄既加絃綆是務夫有安世之貴躬服浣  
濯子有文伯之尊無忘機杼表裏惟安閨闈且  
正醫門有疾對藥無徵天和三年三月二十日  
薨葬于長安之石安原世子某兄弟並勗慈訓  
咸遵母儀霜露深悲寒泉增慟銘曰  
居德圃田當官教府置騎賓來開黌學聚福履  
家室賢才踵武棠棣之華螽斯之羽人倫七德



風化二南采采芣苢萋萋葛覃節行聲玉副笄  
珈簪柳園秉杼桑津浴蠶春秋超忽零落無音  
家亡淑女國喪賢姬香墳永送舞鶴長辭山深  
月闇風急松悲千年開閉將驗靈龜

後魏驃騎將軍荊州刺史賀拔夫人元氏  
墓誌銘

在河之洲聞君子之配德言采其蕨見夫人之  
有禮用之風化人倫厚焉夫人諱安字大羅河  
南洛陽人也祖某京兆康王父昭驃騎大將軍

開府儀同三司錄尚書司州牧汝陽郡王跼  
雄圖皆基霸迹公卿之室將相維國維家夫人  
能修法度無思犯禮恭儉節用憂在進賢大統  
五年封樂安公主歸于賀拔氏嘗年十三思事  
憂勤化成婦德彤管載暉棠棣早茂及乎謳歌  
有歸綸狄降等輔佐君子猶安其室周天和元  
年乃封章武郡君霜露不居風煙飄忽遘疾累  
旬奄捐館舍以周天和四年二月二十六日薨  
于長安萬年里春秋五十有二詔贈頓丘國大



人禮也。卽以其年三月二十日歸葬于咸陽之石安原。旣異乘鸞，翩然永去。雖非舞鶴，卽掩泉門。欲誌佳城，乃爲銘曰：

逝矣雄謀，悠哉霸轍。九服潛運，三川中竭。卿相連鑣，賢才舞絕。琬琰令淑，施衿結褵。方之棠棣，譬以螽斯。旣全婦德，還稱母儀。逝水滔滔，危途冉冉。問藥無對，蒸丹不驗。狄服空陳，絃機虛掩。郭門路轉，哀挽途窮。隴深結霧，松高聚風。春蘭秋菊，唯始唯終。

周大都會陽林伯長孫夫人羅氏墓誌銘

夫人諱某，恒州代郡太平縣人。祖某，父協，周大將軍南陽郡公。夫人資于事親，躬奉訓誡，教于宗室。足聞詩禮，及乎言歸，肅恭如事蘋藻，維敬絃綖。是勤內位，克諧中閨。以睦，年齡不競，霜露先侵，更無延壽之杯，遂闕長生之枕。以周天和四年二月八日薨于長安之洪固鄉，嗚年二十有三。其年某月日葬于萬年縣之壽里山，非宋國，翻爲節女之陵。地異荆臺，遂有賢妃之墓。銘。



曰

畢狼建國、靈武開都、地接天柱、山臨寶符、人資  
義烈、世襲雄圖、葛覃維萋、棠棣早盛、旣安淑德、  
爰從配命、四教弘宣、三星克正、霜凋桂苑、風落  
芝田、三從闕性、五福傷年、歸安永絕、言告長捐、  
悽切郊野、紆迴隰原、風慘雲愁、松悲露泣、朗月  
空嗟、傷神何及、

周儀同松滋公拓跋競夫人尉遲氏墓誌銘

夫人諱某、河南洛陽人也、祖父太師柱國公、魏

室喪亂，經綸夷阻。周朝建國，匡翊揖讓。圖謀帝系，卽有內外之親。分裂山河，仍爲舅甥之國。夫人容範端莊，儀形淑令。六義觀德，南風有夫人之詩。八卦成形，東方有少女之位。姆母習言，公宮教業。箴管線纊，佩悅蒨蘭。年十有二，出適儀同。拓跋競衣其翟服，旣得宗婦之儀。乘其魚軒，還從列國之禮。標梅三實，無闕其貴。天桃九華，能修其政。某年某月，冊拜迴洛縣君。母金明公主。魏文帝長女。春則帝女採桑，秋則王姬築館。



夫人出入主家，遨遊戚里，灌龍園苑，長門宮殿。  
旣而膏腴美疾，華茂傷年，沉痾牀帳，蒸離寒暑。  
三世之術無乏，千醫門百草之本，徒窮于藥性。  
建德三年五月七日亡，春秋三十。昔西河女子  
值九節之菖蒲，東海婦人得三山之芝草，無由  
再遇。悲矣如何！卽以其年十一月十五日葬于  
京兆之北陵原，龜筮告辰，邱陵啓奠。西臨織女  
之廟，南望湘妃之墳，嗚呼哀哉！乃爲銘曰：  
父曰帝師，母曰王姬，車服不繫，江漢無思。是生

令淑觀禮敦詩聲超宋子德茂邢姨繼世盛德  
思賢克舉莫雁迎門濡蘋實俎奉盥如事移茵  
卽序春冰浴蠶秋機秉杼帝鄉近親帝城近臣  
濯龍親戚平陽主人金波迴月玉樹臨春弄玉  
鳳皇昌容紫草自此千年無人得道舜華榮曜  
飄零何早渭水北原平陵故園纔通谷口卽望  
寒門吁嗟此地去矣歸魂孟冬十月長松九年  
親賓掩淚悽愴何言

周驃騎大將軍開府儀同三司冠軍伯柴



烈夫人李氏墓誌銘

夫人諱某隴西狄道人也。周有柱史夫子以之。猶龍漢有將軍宛城以之。輸馬復有西入上書。仍爲秦王之相。東向問計。卽是韓王之師。父宜使持節大將軍南北二華州刺史順陽郡公。魏武皇帝之長舅也。穰侯魏冉居咸陽之官。曲陽王根借明光之殿。語其貴戚。差足擬倫。論其揖謙。彼多慚德。夫人幼而聰敏。早聞令淑。彤管有美。賢才見稱。弄其紙筆。懼失諸兄之意。剪其齒



齡畏傷王母之心。年十有一。出適驃騎大將軍。  
開府儀同三司。烈烈以上將。頒朔中台。受任軍國。  
忠勤規模繁總。夫人輔佐君子。言容匡贊。增耀  
三星。欽明四德。授巾沃盥。有謹于事。始斷織停  
機。無忘于訓。子保定二年。冊授大夏縣君。旣以  
夫尊。又云子貴。乃遷順陽改郡君。夫人之邑。或  
用鄉名。小君之號。多從夫秩。典冊光臨。足稱榮  
寵。本有風氣之疾。頻年增動。畧多枕卧。飛龜之  
散。遣疾無徵。畫龍之符。流年不驗。以今建德四



年三月日薨于館舍春秋四十九卽以其年八月日塋于長安之洪瀆原神光離合尚在河湄雲氣徘徊猶歸樓下嗚呼哀哉乃爲銘曰

上書秦相立功漢將隴水分流秦川遙望秋陸俗勇金行地壯廣武軍中安平河上妻者齊也謂嫁曰歸三星夜照百兩朝飛綸翟有典容禮無違台庭等秩侯服同衣子奉母儀夫聞家政七族承和九閨連慶紛悅恭肅溫清孝敬杼秉秋成蠶隨春令年華未落電影先過徒歎日氣



空飲天河星凋玉井，月捐金坡，虞淵浴日，薤露  
哀歌，寂寞虛奠，荒涼象設，幽隴龜封，重泉蟻結，  
秋色淒愴，松聲斷絕，百年何幾，歸于此別。

庾開府集卷之一終







